



3
403
19



13
403
19



太平御覽卷第一百一

皇王部二十六

後魏諸帝

後魏諸帝

太祖道武皇帝



新念圖書

此係明治八年八月廿一日
所贈田八
即山田
所贈田八
以贈田八

後魏書序紀曰黃帝有子二十五人或內列諸華或外分
荒服昌意少子受封北國有大鮮卑山因以為號其後世
為君長統幽都之北廣漠之野畜牧遷徙射獵為業淳樸
為俗簡易為化不為文字刻木紀契而已世事遠近人相
傳授如史官之紀錄焉黃帝以土德王北俗謂土為托謂
后為跋故以為氏其裔始均入仕堯世逐女魃於弱水北
民賴其勳帝舜嘉之命為田祖爰歷三代以及於秦熏鬻
獫狁山戎匈奴之屬累代殘暴作害中州而始均之裔不
交南夏是以載籍無聞焉積六十七世至成皇帝諱毛立

大平御覽 卷一百一
一
聰武明智遠近所推統國三十大大姓九十威振北方莫不率服成帝崩節皇帝諱貸立節帝崩其後四世宣帝諱推寅立南遷大澤方千餘里厥土昏冥沮洳謀更南徙未行而崩其後六世獻皇帝諱隣立時有神人言於國曰此土方遐未足以建都邑宜復徙居帝年時衰老乃以授子聖武帝諱詰汾獻帝命令南移山谷高深九難入阻於是欲止有神獸其形似馬其聲類牛先行導引歷年乃出始居匈奴之故地其遷徙策略多出宣獻二帝故時人並號曰推寅蓋俗云鑽研之義初聖武帝常率數萬騎田於山澤歛見輜駟自天而下既至見美婦人侍衛甚盛帝異而問之對曰我天女也受命相偶遂同宿旦請還曰明年周時復會於此言終而別去如風雨及莽帝至先所遊處果復相見天女以所生男授帝曰此君子之子也善視之子孫

相承當世爲帝王語訖而去卽始祖神元皇帝也故時人諺曰詰汾皇帝無婦家力微皇帝無舅家帝崩神元皇帝立諱力微生而英獻元年歲在庚子先是西部內侵國民離散依於沒鹿迴部大人竇賓始祖有雄傑之度時人莫測後與賓攻西部賓軍敗失馬步走始祖使人以所乘駿馬給之賓歸令其部內求與馬之人賞當加重賞始祖隱而不言賓後知大驚將分國之半以奉始祖不受賓臨終戒其二子使謹奉始祖其子不從乃陰謀爲逆始祖召而殺之盡并其衆諸部大人悉皆從服控弦士馬二十餘萬三十九年遷於定襄之盛樂始祖乃告諸大人曰我歷觀前世匈奴蹋頓之徒苟貪財利抄掠邊民雖有所得而多其死傷復不足相補更招寇讎百姓塗炭非長計也於是與魏和親四十二年遣子文帝如魏且觀風土是歲魏景

元二年也文皇帝諱沙漠汗以國太子留洛陽爲魏質之冠魏晉禪代和好仍密始祖春秋已邁帝以父老求歸晉武帝具禮護送四十八年帝至自晉五十六年帝復如晉其年冬還國晉遣帝錦罽繒綵綿繪諸物咸豐厚車牛百乘行達并州晉征北將軍衛瓘以帝爲人雄異恐爲後患乃密白晉帝請留不遣晉帝難於失信不許瓘復請以金帛賂國之大人令致閒隙使相厄害晉帝從之遂留帝於是國之執事及部人皆受瓘貨五十八年方遣帝始祖聞帝歸大悅使諸部大人詣陰館迎之酒酣帝仰視飛鳥謂諸大人曰我爲女曹取之援彈飛丸應弦而落時國俗無彈衆咸大驚並先馳還始祖曰我子旣歷他國進德何如皆對曰太子才藝非常引空弓而落飛鳥似得晉人異法怪術亂國害民之兆唯願察之自帝在晉之後諸子愛寵

日進始祖年踰期頤頗有所惑聞諸大人語意乃有疑因曰不可容者便當除之於是大人乃馳詣塞南害帝後乃追謚焉始祖尋崩凡饗國五十八年年一百四歲太祖卽位尊爲始祖

章皇帝諱悉鹿立始祖之子也饗國九年而崩平皇帝諱綽立章帝之少弟也饗國七年而崩思帝弗立文帝少子也卽位一年崩昭皇帝諱祿官立始祖神元之子也九年分國爲三部帝自以一部居東在上谷北須源之西東接宇文部以文帝之長子相皇帝諱猗色統一部居代郡之參合陂北以相帝之弟穆皇帝諱猗盧統一部居定襄之盛樂故城自始祖以來與晉和好百姓乂安財畜富實控弦騎士四十餘萬十年晉惠帝爲成都王穎逼留在鄴匈奴別種劉淵反於離石號漢王并州刺史司馬騰來乞師

太平御覽 卷一百一
帝與桓帝同時大舉以助之大破淵衆於西河上黨晉假
桓帝大單于金印紫綬是歲桓帝崩帝英傑魁岸馬不能
勝常乘安車駕大牛牛角容一石帝會中蠱嘔吐之地仍
生榆木參合陂土無榆樹故世人異之至今傳記十三年
昭帝崩是歲羯胡石勒與晉馬牧帥汲桑反穆皇帝天姿
英峙勇略過人昭帝崩後遂惣攝三部以爲一統元年劉
淵僭帝自稱大漢三年晉并州刺史劉琨遣使以子爲質
又遣使乞師救洛陽帝遣步騎二萬助之晉太傅東海王
司馬越辭以洛中飢饉師還是年劉淵死子聰僭立五年
劉琨遣使乞師以討劉聰石勒帝以琨忠義矜而許之會
聰遣其子粲襲洛陽害琨父母而據其城琨來告難帝大
怒遣長子六脩桓帝子普根及衛雄范班姬澹等爲前鋒
帝統大衆二十四萬爲後繼衆懼弃輜重突圍遁走縱騎

追斬其將劉豐伏尸數百里琨來拜謝帝以禮待之琨固
請進軍帝曰吾不早來致卿父母見害誠以後時相愧今
卿已復州境然吾遠來士馬疲弊且待後期賊豈可盡乎
與琨馬牛羊各千餘車牛百乘又留勁銳戍之而還六年
城盛樂以爲北都脩故平城以爲南都帝登平城西山望
觀地勢乃更南百里於灑水之陽黃瓜堆築新平城晉人
謂之小平城使子六脩鎮之統領南部九年帝召六脩不
至帝怒討之失利乃微服民間遂崩普根先守外境聞難
來赴攻六脩滅之普根立月餘而薨也
平文皇帝諱鬱律立思帝之子也二年西兼烏孫故地東
吞勿吉以西控弦士馬將有百萬劉聰死淵族子曜僭立
帝聞晉愍帝爲曜所害顧謂大臣曰今中原無主天其資
我乎劉曜遣使請和帝不納是年司馬叡稱大位於江南

太平御覽 卷一百一
五年相帝后以帝得衆心恐不利於己子帝遂崩大人死者數十人天興初尊曰太祖惠皇帝諱賀儻立相帝之中子也未親政事太后臨朝遣使與石勒通和時人謂之女國使四年帝始臨朝五年崩煬皇帝諱紇那立惠帝之弟也五年出居於宇文部賀蘭及諸部大人共立烈帝烈皇帝諱翳槐立平文之長子也石勒遣使求和帝遣弟昭成皇帝如襄國二年石勒僭立自稱大趙王烈皇帝崩昭武皇帝諱什翼犍立平文之次子也生而奇偉寬仁大度喜怒不形于色身長八尺隆準龍顏立髮委地卧則乳垂至席烈帝崩顧命曰必迎立什翼犍社稷可安烈帝崩帝弟孤乃自詣鄴奉迎與帝俱還建國元年十一月帝即位於繁時之北時年十九二年始置百官分掌衆職八年張駿私署假涼王十三年魏郡人冉閔殺石鑿僭立十四年氏

符健僭稱天王自號大秦十五年慕容儁滅冉閔僭稱尊號二十七年春車駕還雲中冬十一月討沒歌部破之獲牛馬羊數百萬頭三十四年春長孫斤謀反伏誅斤之反也拔刃向御座太子獻明皇帝諱寔格之傷脅夏五月薨後追謚焉秋七月皇孫珪生大赦三十九年符堅遣其大司馬苻洛率衆二十萬朱彤張蚝音刺鄧羌等諸道來寇侵逼南境冬十一月白部獨孤部禦之敗績南部大人劉庫仁走雲中復遣庫仁率騎十萬逆戰於石子嶺王師不利帝時不豫十二月至雲中旬有二日帝崩時年五十七太祖卽位尊曰高祖帝雅性寬厚智勇仁恕時國中少繒帛代人許謙盜綰二疋守者以告帝匿之謂燕鳳曰吾不忍視謙之面卿勿泄言謙或慙而自殺爲財辱士非也

太祖道武皇帝

後魏書曰太祖道武皇帝諱珽昭成皇帝之嫡孫獻明皇帝之子也母曰獻明賀皇后初因遷徙遊于雲澤既而寢因夢日出室內寤而見光自牖屬天歛然有感以建國三十四年七月七日生太祖於參合陂北其夜復有光明昭成大悅羣臣稱慶大赦告於祖宗保者以帝體重倍於常見竊獨奇怪明年有榆生於埋胞之坎後遂成林弱而能言目有光曜廣穎大耳衆咸異之年六歲昭成崩元年葬昭成皇帝於金陵營梓宮木材盡生成林帝雖沖幼而巋然不群劉庫仁常謂其子曰帝有高天下之志興復洪業光揚祖宗者必此主也登國元年春正月帝卽代王位郊天建元大會於牛川復以長孫嵩爲南部大人以叔孫普洛爲北部大人班敘勳舊各有差夏四月改稱魏王是歲慕容垂僭稱皇帝位於中山自號大燕姚萇僭稱皇帝於

長安自號大秦六年秋七月講武於牛川慕容永使其大鴻臚慕容鈞奉表勸進尊號冬十月北征蠕蠕如蠢追之切及於大磧南商山下大破之班賜從臣各有差十有二月南出居于馬邑是歲起河南宮七年秋八月行幸漠南仍築巡臺八年春正月出南巡二月幸殺羊原赴白樓皇始元年春正月大蒐于定襄之虎山三月慕容垂來寇桑乾川陳留公元虔先鎮平城時帝徵兵未集虔率麾下邀擊失利死之垂遂至平城西北踰山結營聞帝將至乃築城自守疾甚遂遁走死於上谷于寶迎喪而還至中山乃僭立秋七月左司馬許謙上書勸進尊號帝始建天子旌旗出入警蹕於是改元八月治兵于東郊大舉討慕容寶親勒六軍四十餘萬南出馬邑踰于句注旌旗駘驛二千餘里寶并州牧遼西王農棄城東遁并州平初建臺省置百

官封拜公侯將軍刺史太守尚書郎已下悉用文人帝初
拓中原留心慰納諸士大夫請軍門者無少長皆引入賜
見存問周悉人得自盡苟有微能咸蒙敘用冬十月車駕
出井陘十一月進軍中山引騎圍之二年春正月饗羣臣
於魯口慕容寶遣其左衛將軍慕容騰寇博陵殺中山太
守及高陽諸縣令長抄掠租運是時信都未下帝乃進軍
引騎圍之寶將軍張讓護軍徐超率將吏以下舉城降寶
聞帝幸信都乃趣博陵之深澤屯滹沱水遣弟賀麟寇楊
城三月車駕次于盧奴寶遣使求和解焉仍請割常山以
西奉魏乞守中山以東帝許之已而寶背約車駕次中山
命諸將圍之是夜寶弟賀麟妻子出走西山寶見賀麟走
恐先據和龍壬子夜遂將其妻子及兄弟親族數千騎北
遁城內共立慕容普隣爲主麟復入中山殺普隣而自立

九月賀麟飢窮率三萬餘人出寇新市甲子晦帝進軍討
之太史令晁崇奏曰不吉帝曰其義云何對曰昔紂以甲
子亡兵家忌之帝曰紂以甲子亡周武不以甲子勝乎崇
無以對冬十月帝進軍西市賀麟退阻派水依漸洳澤以
自固甲戌帝臨其營戰於義室塢大破之斬首九千餘級
賀麟單馬走西山遂奔鄴慕容德殺之中山平遣三萬騎
赴衛王儀將以攻鄴天興元年春正月慕容德走保滑臺
克鄴車駕幸鄴巡登臺榭觀覽宮城將有定都之意乃置
行臺以龍驤將軍日南公和跋爲尚書與左丞賈彞率郎
吏及兵五千人鎮鄴車駕自鄴還中山所過存問百姓詔
大軍所在州郡復贖租一年除山東民租賦之半車駕將
北還發卒萬人通直道自望都鐵關鑿恒嶺至代五百餘
里六月詔有司議定國號羣臣奏曰昔周秦以前帝玉居

所生之士有國有家及王天下卽承爲號自漢以來罷侯
置守時無世繼其應運而起者皆不由尺土之資今國家
萬世相承啓基雲代臣等以爲若取長遠應以代爲號詔
曰昔朕遠祖摠御幽都控制遐國雖踐王位未定九州迨
于朕躬百代之季天下分裂諸華之主民俗雖殊撫之在
德故躬率六軍掃平土宇凶逆蕩除遐邇率服宜仍先號
爲魏焉秋七月遷都平城始營宮室建宗廟立社稷八月
詔有司正封畿制郊甸端徑術標道里平五權較五量定
五度冬十月起天文殿十有一月詔尚書吏部郎中鄧淵
典官制立爵品定律呂協音樂儀曹郎中盧謐撰郊廟社
稷朝覲饗宴之儀三公郎中王德定律令申科禁太史令
晁崇造渾儀考天象吏部尚書崔玄伯摠而裁之十有二
月帝駕臨於天文殿太尉司徒進璽綬百官咸稱萬歲大

赦改年追尊成皇帝已下及后號謚樂將皇始之舞詔有
司議定行次尚書崔玄伯等奏從土德服色尚黃數用五
未社辰臘犧牲用白五郊立氣宣贊時令劾授民時行夏
之正徙六州二十二郡守宰豪傑吏民二千家于代都二
年春正月初祠上帝于南郊以始祖神元皇帝配降壇視
燎成禮而反二月破高車以所獲之衆起鹿苑於南臺陰
北距長城東苞白登屬之西山廣輪數十里鑿渠引武川
水注之苑中疏爲三溝分流宮城內外又穿鴻鴈池三月
初令五經羣書各置博士增國子太學生員三千人秋七
月起天華殿大闕于鹿苑饗賜各有差冬十月太廟成遷
神元平文昭成獻明皇帝神主于太廟三年三月立皇后
慕容氏是月穿城南渠通於城內作東西魚池夏四月姚
興遣使朝貢五月車駕東巡遂幸涿鹿遣使者以大牢祠

帝堯帝舜廟七月車駕還宮起中天殿及雲母堂金華室
四年三月帝親漁薦于寢廟五月起紫極殿玄武樓冬十
二月集博士儒生比衆經文字義類相從凡四萬餘字號
曰衆文經六年冬十月起西昭陽殿乙卯立皇子嗣爲齊
王加車騎大將軍位相國是年島夷桓玄廢其主司馬德
宗而自立僭稱大楚天賜三年九月幸漠南鹽池至漠中
觀天鹽池六年夏帝不豫初服寒食散自太醫令陰羌死
後藥數動發至此逾甚而災變屢見憂懣莫困切不安或數
日不食或不寢達旦歸咎群下喜怒乖常謂百寮左右曰
人不可信慮如天文之占或有肘腋之虞追思既往成敗
得失終日竟夜獨語不止若傍有鬼物對揚者朝臣至前
追其舊惡便見殺害其餘或以顏色變動或以喘息不調
或以行步乖節或以言詞失措帝皆以爲懷惡在心變見

於外乃手自毆擊死者皆陳天安殿前於是朝野人情各
懷危懼有司廢怠莫敢相督攝百工偷劫盜賊公行巷里
之間人爲稀少帝亦聞之曰朕故縱之使然待過灾年當
更清治之耳冬十月帝崩於天安殿在位十四年時年三
十九先時國內有讖曰珪厄清河死萬人帝破滅清河郡
手殺萬人以厭之夜恒變易寢處人莫得知唯愛妾萬人
知虜帝子清河王紹與萬人通懼罪同害帝帝歎曰清河
萬人乃是汝耶元帝立誅紹及萬人永興二年九月上謚
宣武皇帝葬於盛樂金陵廟號太祖太常五年改謚曰道
武

受大杖則避之今陛下怒盛入或不測陷帝於不義不如且出待怒解而進不晚也帝從之乃遊行於外天賜六年冬十月卽皇帝位大赦改元爲永興元年追尊皇妣爲宣穆皇后公卿大臣先罷歸第不與朝者悉復登用之是年乞伏乾歸自稱秦王海夷馮跋僭號天王國稱大燕三年春二月詔曰衣食足知榮辱夫人飢寒切已惟恐朝夕不濟所急者溫飽而已何暇及於仁義之事乎王教之多違蓋由於此非夫耕婦織內外相承何以家給人足矣其簡宮人非所當御及執作伎巧自餘悉出以賜鰥民三月詔侍臣常佩劔四年二月登虎圈射虎夏四月宴群臣於西宮使各獻言勿有所諱秋七月東巡置四廂大將又放十二時置十二小將以山陽侯奚斤元城公屈行左右丞相是歲沮渠蒙遜僭稱河西王神瑞元年春正月以禎瑞

頻集改年大赦二年六月幸去畿陂觀漁次于瀟源立蟬臺射白熊于頽牛山獲之幸赤城親見長老問民之疾苦復租一年南次石亭幸上谷問百年訪賢俊復田租之半壬申幸涿鹿登橋山觀溫泉使以太牢祠黃帝唐堯廟幸廣甯事如上谷登廣甯之歷山以太牢祠虞舜廟帝親加禮焉泰常元年六月帝自鹿陂西行大獵于牛川登釜山臨躬繁水而南觀于九十九泉三年春正月帝自長川詔護高車郎將薛繁率高車丁零十二部大人衆二萬北至弱水招懷伐叛降者二千餘落獲牛馬二萬餘頭是年赫連屈丐僭稱皇帝四年夏四月車駕有事於東廟遠蕃助祭者數百國五月詔曰宣武皇帝體得一之玄遠應自然之冲妙配純化而御世演大道以宣風大行大名未盡盛美其改宣曰道更上尊謚曰道武皇帝是年劉裕廢殺其

主司馬德文僭稱皇帝自號爲宋七年夏四月封皇子燾爲太平王拜相國初帝服寒食散頻年動發不堪萬機五月詔皇太子臨朝聽政冬十月車駕南巡出自天門關踰恒嶺四方蕃附大人各率所部從者五萬餘人十有一月皇太子親統六軍出鎮塞上八年二月築長城於長川之南起自赤城西至五原延袤二千餘里備置戍衛三月田於鄴南韓陵山幸汲郡至于枋頭濟自靈昌津幸陳留東郡濟河而北西之河內造浮橋於治坂津夏四月幸成臯觀虎牢而城內乏水懸縋汲河帝令連艦上施轆轤絕其汲路轆轤符分切轆於云切兵車也又穿地道以奪其井丁卯幸洛陽觀石經蠻王梅安率渠帥數千人來朝閏月還幸河內北登大行幸高都還晉陽賜百官王公已下至於厮賤無不霑洽五月還次鴈門皇太子率留臺王公迎于句注之北庚

寅車駕至自北巡冬十月廣西宮起外牆周迴二十里是歲民飢詔所在開倉賑給十有一月帝崩於西宮在位十五年時年三十二遺詔以司空奚斤所獲軍實賜大臣自司徒長孫嵩已下至于士卒各有差十二月上謚曰明元皇帝葬于雲中金陵廟稱太宗帝禮愛儒生好覽史傳以劉向所撰說苑新序於經典正義多有所闕乃撰新集三十篇採摭經史該洽古義兼資文武焉

世祖太武皇帝

後魏書曰世祖太武皇帝諱燾太宗明元皇帝長子也母曰杜貴嬪天賜五年生於東宮體貌瓌異太祖奇而悅之曰成吾業者此子也泰常七年四月封太平王五月爲監國太宗有疾命帝摠攝百揆聰明大度意豁如也八年十一月卽皇帝位大赦天下十有二月追尊皇妣爲密皇太

后進司徒長孫嵩爵爲北平王司空奚斤爲宜城王藍田公長孫翰爲平陽王其餘普增爵位各有差始光元年夏四月東巡幸大寧二年三月尊保母竇氏曰保太后營故東宮爲萬壽宮起永安安樂二殿臨望觀九華堂初造新字千餘詔曰昔帝軒翊制造物乃命倉頡因鳥獸之跡以立文字繼歷久遠傳習多失其真今制定文字世所用者頒下遠近永爲楷式是年赫連屈丐死子昌僭立三年春二月起太學於城東祠孔子以顏淵配十有一月帝率輕騎二萬襲赫連昌至其城下徙萬餘家而還十有二月武都氏王楊玄及沮渠蒙遜等皆遣使內附四年春赫連昌遣其弟平原公定率衆二萬向長安帝聞之乃遣就陰山代木大造攻具二月車駕還宮三月遣高涼王禮鎮長安詔執金吾桓貸造橋於君子津五月車駕西討赫連昌濟

君子津至于黑水帝親祈天告祖宗之靈而誓衆焉六月昌引衆出城大破之車駕入城虜昌群弟及其諸母姊妹妻妾宮人萬數府庫珍寶車旗器物不可勝計八月車駕至自西征飲至策勳告於宗廟班軍實以賜留臺百寮各有差冬十一月以氏王楊玄爲都督荆梁益寧四州諸軍事假征南大將軍梁州刺史南秦王神麴音加元年春正月以天下守令多行非法精選忠良悉代之二月改元是歲皇子晃生三年春正月行幸廣甯臨溫泉作溫泉之歌三月帝聞劉義隆將寇邊乃詔龔定相三州造船三千艘簡幽州已南戍兵集于河上以備之秋七月詔諸征鎮將軍王公仗節邊遠者聽開府辟召其次增置吏員詔大鴻臚卿杜超假節都督冀定相三州諸軍事行征南大將軍太宰進爵爲王鎮鄴爲諸軍節度九月立密皇太后廟于鄴

甲辰行幸統萬遂征平涼十一月車駕至平涼先是赫連定將數萬人東御於鄜城留其弟上谷公杜于廣陽公度洛孤城守帝至平涼登北原使赫連昌招喻之杜于不降遂掘塹圍守之十二月定弟杜于度洛孤面縛出降平涼平收其珍寶定長安臨晉武功守將皆奔走關中平車駕東還留巴東公延普等鎮安定四年九月加太尉長孫嵩柱國大將軍特進左光祿大夫崔浩爲司徒征西大將軍長孫道生爲司空詔曰頃逆命縱逸方夏未寧戎軍屢駕不遑休息今二寇摧殄士馬無爲方將偃武修文遵太平之化昧且思求想遇師輔訪諸有司咸稱范陽盧玄博陵崔綽趙郡李靈河間邢穎滄水高允廣平游雅太原張偉等皆賢雋之曹冠冕州邦羽儀之用庶得其人任之政事共臻邕熙之美易曰我有好爵吾與爾縻之如玄之比隱

跡衡門不曜名譽者盡勅州郡以禮發遣遂徵玄等及州郡所遣至者數百人皆差次敘用冬十月詔司徒崔浩改定律令延和元年春正月尊保太后爲皇太后立皇后赫連氏立皇子晃爲皇太子謁於太廟大赦改年太延元年出太祖太宗宮人令得嫁大赦改年六月詔曰去春小旱冬作不茂憂勤尅己祈請靈祇上下咸秩豈朕精誠有感何報應之速雲雨震洒流澤沾渥有鄙婦人持方寸玉印詣潞縣侯孫家旣而亡去莫知所在玉色鮮白光照內映印有三字爲龍鳥之形要妙奇巧不類人迹文曰旱疫平推尋其理蓋神靈之報應也朕用嘉焉比者以來禎瑞仍臻所在非一天降嘉貺將何德以酬之所以內省警震欣懼交懷其令天下大醮五日禮報百神守宰祭界內名山大川上答天意以求福祿二年十一月行幸柵音陽驅野

馬於雲中置野馬苑三年高麗契丹國龜茲悅般焉耆車師粟特疏勒烏孫渴槃陀善善諸國各遣使朝獻奉汗血馬四年春罷沙門年五十已下五年六月車駕西討沮渠牧犍侍中宜都王穆壽輔皇太子決留臺事八月車駕至姑臧牧犍兄子祖踰城來降乃分軍圍之九月牧犍兄子萬年率麾下來降是日牧犍與左右文武五千人面縛軍門帝解其縛待之以蕃臣之禮收其城內戶口二十餘萬倉庫珍寶不可稱計冬十月車駕東還宮徙涼州民三萬餘家于京師太平貞君元年六月皇孫濬生大赦改元三年春正月帝至道壇親受符籙備法駕旗幟盡青十月封皇子伏羅爲晉王翰爲秦王譚爲燕王建爲楚王余爲吳王四年冬十一月詔曰朕承祖宗重光之緒思闡洪基恢隆萬世自經營天下剪暴除亂掃清不順二十年矣夫陰

陽有往復四時有代謝授子任賢所以休息優隆功臣式圖長久蓋古今不易之令典也令皇太子副理萬機摠統百揆諸朕功臣勤勞日久皆當以爵歸第隨時朝請饗宴朕論道陳謨而已不宜復煩劇職更舉賢俊以備百官主者明爲科制以稱朕心五年春正月皇太子始摠百揆諸上書者皆稱臣詔曰愚民無識信惑妖邪私養師巫挾藏讖記陰陽圖緯方伎之書又沙門之徒假西戎虛誕生致妖孽非所以一齊政化布淳德于天下也自王公已下至於庶人有養沙門師巫及金銀工巧之人在其家者皆遣詣官曹不得容匿限今年二月十五日過期不出師巫沙門身死主人門誅明相宜告咸使知聞詔曰自頃已來軍國多事未宣文教非所以整齊風俗示軌則於天下也今制自王公已下至於卿士其子息皆詣太學其百工伎巧

騶卒子息當習其父兄所業不聽私立學校違者師身死
主人門誅六年春正月車駕行幸定州引見長老存問之
二月遂西幸上黨觀連理樹於元氏十一月遣殿中尚書
安定公韓茂率騎屯相州之陽平郡發冀州民造浮橋於
碣苦交敬五交津七年二月幸長安存問父老丁亥幸昆
明池三月詔諸州坑沙門毀諸佛像徙長安城內工巧二
千家於京師車駕旋軫幸洛水夏四月車駕至自長安毀
鄴城五層佛圖於泥像中得玉璽二其文皆曰受命於天
既壽永昌其一刻其旁曰魏所受漢傳國璽八年六月西
征諸將扶風公元龜真等八將坐盜沒軍資所在虜掠賊
各千萬計並斬之九年冬十月以婚姻奢靡喪葬過度詔
有司更爲科限十有一年春正月行幸洛陽所過郡國皆
親對高年存恤孤寡遂征懸瓠夏四月車駕還宮賜從者

及留臺郎吏已下生口各有差六月誅司徒崔浩九月車
駕南伐冬十月車駕濟河詔諸將分道並進使征西大將
軍永昌王仁自洛陽出壽春尚書長孫真趨馬頭楚王建
趨鍾離高涼王邠自青州趨下邳車駕自中道十一月至
鄒山劉義隆魯郡太守崔耶利率屬城降使使者以太牢
祀孔子次于彭城遂趨盱音怡十二月車駕至淮詔刈
藿葦作筏數萬而濟義隆盱眙守將臧質閉門距守將軍
胡崇之等率衆二萬援盱眙燕王譚大破之臬崇之等斬
首萬餘級淮南皆降是月永昌王仁攻懸瓠拔之獲義隆
守將趙淮送京師斬之車駕臨江起行宮於瓜步山義隆
使獻百牢貢其方物又請進女於皇孫以求和好帝以師
婚非禮許和而不許婚使散騎侍郎夏侯野報之帝詔皇
孫爲書致馬通問焉正平元年二月車駕濟河次于魯口

皇太子朝於行宮十二月車駕至自南伐飲至策勳告於宗廟夏五月大赦六月改年十月封皇孫濬爲高陽王尋以皇孫世嫡不宜在藩乃止改封秦王翰爲東平王燕王譚爲臨淮王楚王建爲廣陽王吳王余爲南安王二年二月帝崩於永安宮在位二十九年時年四十五秘不發喪中常侍宗愛矯皇后令殺東平王翰迎南安王余入而立之大赦改元爲承平三月上尊謚曰太武皇帝葬于雲中金陵廟號世祖冬十月余爲宗愛所賊殿中尚書長孫渴侯與尚書陸麗迎立皇孫是爲高宗帝生不逮密太后及有所識言則悲慟哀感傍人太宗聞而嘉歎暨太宗不豫衣不釋帶性清儉率素服御飲饌取給而已不好珍麗食不二味所幸昭儀貴人衣無縑絲羣臣白帝更峻京邑城隍以從周易設險之義又陳蕭何壯麗之說帝曰古人有

言在德不在險屈丐蒸土築城而朕滅之豈在城也天下未平方須民力土功之事朕所未爲蕭何之對非雅言也每以財者軍國之本無所輕費至於賞賜皆是死事勳績之家親戚愛寵未曾橫有所及

高宗文成皇帝

後魏書曰高宗文成皇帝諱濬景穆皇帝之長子也母曰閻氏眞君元年六月生於東宮帝少聰達世祖愛之常置左右號世嫡皇孫年五歲世祖北巡帝在後逢虜帥恠一奴欲加其罰帝謂之曰奴今遭我汝宜釋之帥奉命解縛世祖聞之曰此兒雖小欲以天子自處意奇之旣長風格異常每有大政常參決可否正平二年二月中常侍宗愛弑逆立南安王余十月又賊余於殿中尚書長孫渴侯與尚書陸麗奉迎皇孫卽帝位於永安前殿改元興安元年

十二月初復佛法二年二月發京師五千人穿天淵池是月劉義隆子劭殺其父而自立夏五月行幸嶧音郭山是月劉邵弟駿殺劭而自立閏月太后赫連氏崩八月詔曰朕以眇身纂承大業卽位以來百姓晏安風雨順序邊方無事衆瑞兼呈不可稱數又於內苑獲方寸玉印其文曰子孫長壽羣公卿士咸曰休哉豈朕一人尅臻斯應實由天地祖宗降祐之所致也思與兆庶共茲嘉慶其令民大酺三日諸殊死已下各降罪一等興光元年二月帝至道壇登受圖籙七月皇子弘生大赦改元太安元年遣尚書穆伏真等二十人巡行州郡觀察風俗二年春正月立皇后馮氏二月丁巳立皇子弘爲皇太子大赦天下三年冬十月將東巡狩詔太宰常英起行宮於遼西黃山四年春正月至遼西黃山宮二月登碣石山觀滄海大饗羣臣於山

上班賞進爵各有差改碣石爲樂遊山築壇記行於海濱冬十月北巡至陰山有故冢毀廢詔曰昔姬文葬枯骨天下歸仁自今有穿毀墳壠者斬之和平二年正月詔曰刺史牧民爲萬里之表自頃每因發調逼民假貸大商富賈要射時利旬日之間增贏十倍上下同通分以潤屋故編戶之家困於凍餒豪富之門日有兼積爲政之弊莫過於此其一切禁絕犯者十疋以上皆死布告天下咸令知禁二月行幸中山遂幸信都車駕所過皆親對高年問民疾苦詔民年八十以上一子不從役靈丘南有山高四百餘丈乃詔羣臣仰射山峯無能踰者帝彎弧發矢出山三十餘丈過山南二百二十步遂刊石勒銘三年冬十月詔曰夫三代之隆莫不崇尙年齒今選舉之官多不以次令班白處後晚進居先豈所謂彝倫攸敘者也諸曹選補宜各

先盡勞舊才能十二月制戰陣之法十有餘條因大讎曜
兵有飛龍騰虵魚麗之變以示威武四年春三月賜京師
民年七十已上太官廚食以終其年夏四月上幸西苑親
射虎三頭五月行幸陰山秋七月詔曰朕每歲閏月命羣
臣講武平壤所幸之處必立宮壇糜費之功損勞非一宜
仍舊貫何必改作也八月遂田於河西詔曰朕順時田獵
而從官殺獲過度既殫禽獸乖不合圍之義其勅從官及
典圍將校自今已後不聽濫殺其田獲皮肉別自頒贖十
二月詔曰名位不同禮亦異數所以殊等級示軌儀今喪
葬嫁娶大禮未備貴勢豪富越度奢靡非所謂式昭典憲
者也有司可爲之條格使貴賤有章上下咸序著之于令
詔曰夫婚姻者人道之始尊卑高下宜令區別然中古以
來貴族之門多不率法或貪利財賄或因緣私好在於苟

合無所擇選令貴賤不分巨細同貫塵穢清化虧損人倫
將何以宣示典謨垂于來裔今制皇族肺腑王公侯伯及
士民之家不得與百工伎巧卑姓爲婚犯者加罪六年四
月破洛鄯國獻汗血馬普嵐國獻寶劍五月帝崩於太華
殿在位十四年時年二十六六月上尊謚曰文成皇帝廟
號高宗葬雲中之金陵

太平御覽卷第一百二

太平御覽卷一百三
 後魏顯宗獻文皇帝
 高祖孝文皇帝
 肅宗孝明皇帝
 顯宗獻文皇帝
 世宗宣武皇帝
 後魏顯宗獻文皇帝
 皇王部二十八

太平御覽卷第一百三

皇王部二十八

後魏顯宗獻文皇帝

高祖孝文皇帝

世宗宣武皇帝

肅宗孝明皇帝

顯宗獻文皇帝

後魏書曰顯宗獻文皇帝諱弘高宗文成皇帝之長子也
 母曰李貴人興光元年秋七月生於陰山之北太安二年
 二月立為皇太子聰敏機悟幼有濟民神武之規仁孝純
 至禮敬師友和平六年夏五月即皇帝位大赦天下秋七
 月太尉乙渾為丞相事無大小皆決於渾是歲劉子業叔
 父彧殺子業僭立天安元年春正月大赦改元二月丞相
 太原王乙渾謀反伏誅皇興元年閏月劉彧青州刺史沉
 文秀冀州刺史崔道固並遣使請舉州內屬二年夏四月

高麗庫莫奚契丹于闐波期諸國各遣使朝獻四年三月
詔宣告天下民有病者所在官司遣醫就家診視所須藥
物任醫所須量給之八月帝欲禪位於叔父京兆王子推
羣臣固請帝乃止後下詔曰朕承洪業運屬太平淮岱率
從四海清晏是以希心玄古志存淡泊躬覽萬務則損頤
神之和一月或曠政有滯淹之失且子有天下歸尊於父
父有天下傳之於子今稽叶靈運考會羣心爰命儲宮踐
昇大位朕方優遊恭己栖心浩然社稷乂安克廣其業不
亦善乎百官有司其祗奉元子以答天休宣布宇內咸使
聞悉於是羣公奏曰三皇之世澹泊無爲故稱皇是以漢
高既稱皇帝尊其父爲太上皇明不統天下今皇帝幼冲
萬機大政猶宜陛下揔之謹上尊號太上皇帝乃從之太
上皇徙御崇光宮採椽不斲土堦而已國之大事咸以聞

承明元年年二十三崩于永安殿在位六年謚曰獻文皇
帝廟號顯祖葬雲中金陵

高祖孝文皇帝

後魏書曰高祖孝文皇帝諱宏顯祖獻文皇帝之長子母
曰李夫人皇興元年八月生平城紫宮神光照室天地氤
氲和氣充塞帝生而潔白有異姿襁褓岐嶷長而淵裕仁
孝卓然有君人之表顯祖尤愛異之三年夏六月立爲皇
太子五年秋八月卽皇帝位於太華前殿大赦改元延興
元年冬十月沃野統萬二鎮叛詔太尉隴西王元賀追擊
至枹音符罕滅之斬首三萬餘級徙其遺逆於翼定相三州
爲營戶十二月詔訪舜後獲東萊郡民媯苟之復其家畢
世以彰盛德之不朽二年春二月詔曰尼父稟達聖之姿
體生知之量窮理盡性道光四海頃者淮徐未賓廟隔非

所致令祠典寢頓禮章殄滅遂使女巫妖覘淫進非禮殺
生鼓舞倡優嫖音狎豈所以尊明神敬聖道者自今已
後有祭孔子廟制用酒脯而已不聽婦女雜合以祈非望
之福犯者以違制論夏四月詔工商雜類盡聽赴農詔沙
門不得去寺浮遊民間是月劉彧死子昱僭立秋七月詔
州郡縣各遣二人才堪專對者赴九月講武當親問風俗
詔縣令能靜一縣劫盜者兼治二縣卽食其祿能靜二縣
者兼治三縣三年遷爲郡守二千石能靜二郡上至三郡
亦如之三年遷爲刺史三月詔諸倉屯穀麥充積者出賜
貧民夏四月詔以孔子二十八世孫魯郡孔乘爲崇聖大
夫給以十戶供洒掃四年九月以劉昱內相攻戰詔將軍
元蘭將三萬騎及假東陽王丕爲後繼伐蜀漢承明元年
六月太上皇帝崩大赦改年尊皇太后爲太皇太后臨朝

稱制秋七月追尊皇妣李貴人爲思皇太后太和元年七
月劉昱死弟准僭立二年夏四月京師旱祈天災於北苑
親自禮焉減膳避正殿澍雨大洽曲赦京師九月龜茲國
遣使獻龍馬三年四月吐谷渾國遣使獻鼈牛五十頭是
年烏夷蕭道成廢其主劉准而僭立自號曰齊四年春罷
畜鷹鷄之所以其地爲報德佛寺五月詔會京師耆老賜
錦綵衣服几杖稻米蜜麪復家人不徭役六年三月蕭道
成死子曠僭立七年閏月皇子生大赦天下定州上言爲
粥給飢民所活九十四萬七千餘口八月詔曰帝業至重
非廣詢無以至治今制百辟卿士工商吏民各上便宜利
民益治損化傷政直言極諫勿有所隱務令辭無煩華理
從簡寔朕將親覽以知世要使言之者無罪聞之者足以
戒九年春正月詔曰圖讖之興起於三季旣非經國之典

徒爲妖邪所憑自今圖讖祕諱及名爲孔子閉房記者一切皆焚之留者以大辟論又諸巫覡假稱神鬼妄說吉凶及委巷諸卜非墳典所載者嚴加禁斷大饗羣臣于太華殿班賜皇誥十年春正月帝始服袞冕饗萬國二月初立黨里鄰三長定民戶籍夏四月始制五等公服帝服以法服御輦祀於西郊八月給尚書五等品爵已上朱衣玉佩大小組綬九月詔起明堂辟雍冬十月有司議依故事配始祖於南郊十有一年春正月詔定樂章非雅者除之十有一月詔罷尚方錦繡綾羅之工四民欲造任之無禁其御府衣服金銀珠玉綾羅錦繡太官雜器太僕乘具內庫弓矢出其大半班賚百官及京師民庶下至工商皂隸逮於六鎮戍士各有差十二月詔祕書丞李彪著作郎崔光改析國記依紀傳之體十有二年春正月初建五牛旌旗

月詔雲中河西及關內六郡各脩水田通渠溉灌增置彝器於太廟九月起宣文堂經武殿十三年春正月車駕有事於圓丘於是初備大駕七月幸靈泉池與羣臣御龍舟賦詩而罷立孔子廟於京師十有四年八月詔議國之行次九月皇太后馮氏崩冬十月葬文明太后於永固陵車駕謁永固陵群臣固請公除帝不許帝居廬引見群寮於太和殿東陽王丕等據權制固請帝引古禮往復羣臣乃止十五年春正月帝始聽政於皇信東室初分置左右史官夏四月帝始進蔬食自正月不雨至于六月有司奏祈百神詔曰昔成湯遇旱齊景逢災並不由祈山川而致雨皆至誠發中澍潤千里萬方有罪在予一人今普天喪恃幽顯同哀神若有靈猶應未忍安饗何宜四氣未周便行祀事當考躬責己以待天譴五月議改律令上於東明觀

析疑獄八月議養老又議肆類上帝禋于六宗之禮帝親臨決詔郡國有時物可以薦宗廟者貢之移道壇於桑乾之陰改曰崇靈寺詔諸州舉秀才先盡才學親定褹袷之禮議律令十有一月詔二千石考在上上者假四品將軍賜乘黃馬一疋上中者五品將軍上下者賜衣一襲十有二月帝爲高麗王璉舉哀於城東行宮車駕迎春於東郊十有六年春正月饗羣臣於太華殿帝始爲王公興懸而不樂宗祀顯祖獻文皇帝於明堂以配上帝遂昇靈臺以觀雲物詔定行次以水承金制諸遠屬非太祖子孫及異姓爲王者皆降爲公公爲侯侯爲伯伯爲子子爲男二月詔祀唐堯於平陽祀虞舜於廣寧夏禹於安邑周文王於洛陽改謚宣尼曰文聖尼父告謚孔廟夏四月頒新律令大赦天下八月司徒尉元以老遜位以尉元爲三老游明

根爲五更又養國老庶老詔曰夫文武之道自古並行威福之施必也相籍故三五至仁尙有征伐之事夏殷明獻未捨兵甲之行今則訓文有典教武闕然於習武之方猶爲未盡將於馬射之前先行講武之式可勅有司豫脩場埒其列陣之儀五戎之數別俟後勅冬十月太極殿成大饗羣臣十有七年夏四月立皇后馮氏六月帝將南代詔造河橋立皇子恂爲皇太子秋七月以皇太子立詔賜民爲父後者爵一級是月蕭蹟死孫昭業僭立八月車駕發京師南伐步騎三十餘萬太尉丕奏請以宮人從詔曰臨戎不語內事宜停車駕至肆州幸并州親見高年問疾苦車駕所經傷民秋稼畝給穀五斛戊辰濟河詔洛懷并肆所過四州賜高年爵百年以上假縣令九十以上賜爵三級八十以上賜爵二級七十以上賜爵一級鰥寡孤獨不

能自存者粟人五斛帛二疋幸洛陽周巡故宫基趾帝頗謂侍臣曰晉德不脩早傾宗祀荒毀至此用傷朕懷遂詠黍離之詩爲之流涕觀河橋幸太學觀石經詔六軍發軫帝戎服執鞭御馬而出群臣稽顙於馬前請停南伐帝乃止仍定遷都之計冬十月幸金墉城詔徵司空穆亮與尚書李冲將作大匠董爵經始洛陽京己卯幸河南城幸豫州解嚴設壇於滑臺城東告行廟以遷都之意大赦天下還幸鄴十有八年春朝群臣於鄴宮車駕南巡幸洛陽西宮二月行幸河陽規建方澤之所車駕北巡至平城宮臨朝堂部分遷留三月罷西郊祭天帝臨太極殿喻在代群臣以遷移之略秋七月以宋王劉昶爲大將軍是月烏夷蕭鸞殺其主蕭昭業立業弟昭文冬十月親告太廟奉遷神主車駕發平城宮次於中山之唐湖是月蕭鸞廢殺其

主蕭昭文而僭立車駕幸鄴經比干墓傷其忠而獲戾親爲吊文樹碑而刊之車駕至洛陽蕭鸞雍州刺史曹虎據襄陽降十有二月車駕至懸瓠詔壽陽鍾離馬頭之師所獲男女之口皆放還南十有九年春正月饗羣臣於懸瓠講武於汝水之西大賚六軍車駕濟淮二月幸八公山路中雨甚詔去蓋見軍士病者親恤之車駕至鍾離軍士擒鸞三千卒帝曰在君爲君其民何罪於是免歸之車駕發鍾離遣使臨江數蕭鸞罪惡幸小沛遣使以太牢祭漢高祖廟行幸瑕丘以太牢祠岱岳詔選諸孔宗子一人封崇聖侯邑百戶以奉孔子之祀又詔兗州爲孔子起園柏脩飾墳壠更建碑銘褒揚聖德行幸滑臺次于石濟車駕至自南伐六月詔始爲漢語不得以北俗之語言於朝廷若有違者免所居官詔求天下遺書祕閣所無有裨時用者

加以優償詔遷洛之民死葬河南不得還北於是代人南
遷者悉爲河南洛陽人詔改長尺大升依周制度班之天
下八月詔選天下武勇之士十五萬人爲羽林虎賁以充
宿衛九月六宮及文武盡遷洛陽十有二月引見羣臣於
光極堂宣示品令第大選之始二十年春正月詔改姓爲
元氏二月詔介山之邑聽爲寒食自餘禁斷帝以旱咸秩
群神自癸未不食至于乙酉是夜澍雨大洽十有二月開
鹽池之禁與民共之置常平倉二十有一年春正月立皇
子恪爲皇太子夏四月行幸長安遣使者以太牢祭周文
王於豐祭武王於鎬六月車駕至自長安帝親爲羣臣講
喪服於清徽堂八月車駕南討九月車駕至新野冬十月
四面進攻不尅詔左右軍築長圍以守之二十有二年春
正月拔新野三月大破蕭鸞平北將軍崔惠景黃門郎蕭

衍軍於鄧城斬獲首虜二萬有餘秋七月詔曰朕以寡德
屬茲喪亂實賴群英凱清南夏宜躬賞功以勸茂績后
之私府便可損半六宮嬪御五服男女恒恤恒供亦令減
半在戎之親三分省一是月蕭鸞死子寶卷僭立九月帝
以蕭鸞死禮不代喪乃詔反旆二十有三年春正月朝群
臣於鄴宮三月車駕南伐帝不豫司徒彭城王勰音協侍疾
禁中攝百揆車駕至馬圈賊將蔡道福成公期率萬人奔
順陽遁走帝疾甚車駕北次穀塘原詔司徒總徵太子於
魯陽踐祚夏四月帝崩於穀塘原之行宮在位二十九年
時年三十三祕諱至魯陽發喪還京師上謚曰孝文皇帝
廟曰高祖葬長陵帝幼有至性寡寬慈每垂矜捨進食者
曾以熟羹傷帝手又曾於食中得蟲穢之物笑而恕之宦
者譖帝於太后太后大怒杖帝數十帝默而不自明太后

崩後亦不以介意聽覽政事從善如流哀矜百姓恒思所以濟益天地五郊宗廟二分之禮常必躬親不以寒暑爲倦雅好讀書手不釋卷五經之義覽之便講學不師授探其精奧史傳百家無不該涉善談莊老尤明釋義才藻富贍好爲文章詩賦銘頌任興而作有大文筆馬上口授及其成也不改一字自泰和十年已後詔冊皆帝之文也自餘文章百有餘篇愛奇好士情如飢渴待納朝賢隨才輕重常寄以布素之意悠然玄邁不以世務嬰心又少而善射有膂力年十餘歲能以指彈碎羊膊骨及射禽獸莫不隨志而斃之至年十五便不復殺生射獵之事悉止性儉素常服澣濯之衣鞍勒鐵木而已帝之雅志皆此類也

世宗宣武皇帝

後魏書曰世宗宣武皇帝諱恪高祖孝文皇帝之第二子

也母曰高夫人初夢爲日所逐避之床下日化爲龍繞夫人數匝寤而驚悸既有娠泰和七年閏四月生帝於平城宮二十一年正月立爲皇太子二十三年夏四月即皇帝位于魯陽大赦天下帝居諒闇委政宰輔秋八月遵遺詔高祖三夫人以下悉歸家景明元年春正月車駕謁長陵大赦改年丁未蕭寶卷豫州刺史裴叔業以壽春內屬二年春正月帝始親政三月詔曰治尚簡靜任貴應事州府佐史除授稍多誠爲損弊無益政道又京師百司寮屬殷雜官有閑長者亦同此例苟非精要悉從蠲省是月蕭衍立寶卷弟南康王寶融爲主年號中興東赴建業九年發畿內夫五萬五千築京師三百二十三坊四旬而罷立皇后于氏十有一月築圓丘於伊水之陽仍有事焉是月寶卷直後張齊殺寶卷降蕭衍衍克建業三年三月寶卷

弟建安王寶寅來降是月蕭衍又廢其主寶融而僭立自稱曰梁九月車駕行幸鄴詔使者吊殷比干墓閱武於鄴南冬十月帝親射遠及一里五十步羣臣勒銘於射所四年春正月車駕籍田於千畝三月皇后先蠶於北郊夏四月南天竺國獻辟支佛牙正始元年春正月大赦改年八月詔洛陽令有大事聽面敷奏元英攻義陽拔之擒送蕭衍冠軍蔡靈恩等十餘將英又大破衍將仍清三關冬十有一月勅有司依漢魏舊章營繕國學十二月以苑牧公田分賜伐遷之戶詔羣臣議定律令二年詔尚書李崇太府卿于忠散騎常侍游肇諫議大夫鄧羨俱爲大使糾斷畿內其守令之徒咎失彰露者卽便施汝州鎮重職聽爲表聞三年春正月皇太子生大赦天下十一月帝爲京兆王愉清河王懌廣平王懷汝南王悅講孝經於式乾殿十

一月禁河南畜牧馬自碣石至於劍閣東西七千里置三十二都尉永平元年六月詔曰慎重獄刑著於往誥朕御茲寶曆明鑒未遠斷決煩疑寔有攸愧可依洛陽舊圖修聽訟觀農隙起功及冬令就當與王公卿士親臨錄問八月冀州刺史京兆王愉據州反假尚書李平鎮北將軍行冀州刺史討之大赦改元平尅信都執愉羣臣請誅帝弗許詔送京兆二年春正月胡密步就磨忸密盤是悉萬斤辛豆擲越拔忸諸國並遣使朝獻嘸噠薄知國遣使來朝貢白象高昌國遣使朝貢冬十月郢州獻七寶牀詔不納十一月詔禁屠殺含孕以爲永制帝於式乾殿爲諸僧朝臣講維摩詰經三年冬十月詔曰朕乘乾御曆年周一紀而道謝擊壤教慙刑措至於下人之勞音瓊鰥疾苦心常愍之此而不恤豈爲民父母之意也可勅太常於閑敞之廡

嚴勅醫署分師療治考其能否而行賞罰雖齡數有期脩短分定然六疾不同或賴針石庶秦扁之言理驗今日矣又經方浩博條流處廣應病投藥卒難窮究更令有司集諸醫士尋篇推簡務存精要取三十餘卷以班九服郡縣備寫布下鄉邑使知救患之術延昌元年三月京師穀貴出倉粟八十萬石以賑貧者夏四月詔曰肆州地震陷死傷甚多言念毀沒有酸懷抱亡者不可復追生病之徒宜加療救可遣大醫折傷醫并給所取之藥就治之大赦改元二年夏四月庚子以絹五十五萬疋賑恤河南郡飢民三年春三月詔曰肆州秀容郡敷城縣鴈門郡原平縣並自去年四月以來山鳴地震于今不已告譴彰咎朕甚懼焉祇畏兢兢若臨深谷可恤瘼寬刑以答災譴四年正月帝不豫丁巳崩于式乾殿時年三十三謚曰宣武皇帝廟

號世宗葬景陵帝幼有大度喜怒不形於色雅性儉素初高祖欲觀諸子志尚乃大陳寶物任其所取京兆王愉等皆競取珍玩帝唯取骨如意而已高祖大奇之及庶人恂失德高祖謂彭城王勰音協曰吾固疑此兒有非常志相今果然矣雅愛經史尤長釋氏之義每至講論連夜忘疲善風儀美容貌臨朝淵嘿端嚴若神有君人之量矣

肅宗孝明皇帝

後魏書曰肅宗孝明皇帝諱胡世宗宣武皇帝之第二子母曰胡充華永平三年三月帝生于宣光殿之東北有光照于庭中延昌元年十月立爲皇太子四年春正月丁巳夜卽皇帝位大赦天下詔太保高陽王雍入居西柏堂決庶政又詔任城王澄爲尙書令百官總己以聽於二王二月尊皇后高氏爲皇太后三月皇太后出俗爲尼徙御金

塘城八月尊皇太妃爲皇太后帝朝皇太后於宣光殿大赦天下群臣奏請皇太后臨朝稱制九月皇太后親覽萬機熙平元年春正月大赦改年二年八月宴太祖已來宗室年十五已上於顯陽殿申家人之禮九月詔曰察訟理寃寔惟政首躬親聽覽民信所由自今月望當暫出城闈親決滯枉主者可宣諸近遠咸使聞知神龜元年二月詔以神龜表瑞大赦改年七月開恒州銀山之禁與人共之二年九月皇太后幸崧高山正光元年秋七月侍中元乂劉騰奉帝幸前殿矯皇太后詔曰世祖宣武皇帝以獻明承業廓寧區夏而鴻功未半早年登遐乃車書弗同勅寇尙熾幼主稚弱夙纂寶曆曾是宗祏莫尅祇奉朕所以敬慎羣請臨朝摠政俛從事以迄于茲自此春來先疠屢發夏首及今數加重劇恐不堪日釐萬務巨細兼省帝齒

周星紀識學逾躋日就月將人君道茂足以撫緝萬邦諧決百揆朕當率前志敬遜別宮乃幽皇太后於北宮殺太傅領太尉清河王懌乂等摠勒禁旅決事殿中帝加元服大赦改年九月蠕蠕而蠢主阿那瓌來奔以太師高陽王雍爲丞相十月詔曰蠕蠕世雄朔方擅制漠表隣通上國百有餘載且優以賓禮期之立功疏爵胙土大啓河岳可封朔郡公蠕蠕王食邑一千戶錫以袞冕加之輕蓋祿秩儀衛同於戚藩二年三月駕幸國子學講孝經祠孔子以顏淵配十有二月詔司徒崔光安豐王延明等議定服章三年春正月辛亥帝耕籍田十有一月車駕有事園丘詔曰治曆明時前王茂軌考辰正律奕代通規去歲神龜中始命儒官改度易憲始會璇衡今天正斯始陽煦將開品物初萌宜變耳目所謂魏雖舊邦其曆惟新者也便可

班宣內外號曰正光曆思與億兆共此惟新可大赦天下
十二月以牧守妄立碑頌輒興寺塔第宅豐侈店肆商販
詔中尉端衡肅厲威風以見事糾劾七品六品祿足代耕
亦不聽錮貼占肆爭利城市也四年春二月蠕蠕主阿那
瓌帥衆犯塞遣尚書左丞元孚兼尚書爲北道行臺持節
喻之四月阿那瓌執元孚驅掠畜牧北遁詔驃騎大將軍
尚書令李崇中軍將軍兼尚書右僕射元纂帥騎十萬討
蠕蠕出塞三千餘里不及而還五年秦州城人莫折大提
據城反自稱秦王殺刺史李彥詔雍州刺史元志討之南
秦州城人孫獠張絞切張長命韓祖香據城反殺刺史崔遊
以應大提遣城人卜胡襲尅高平殺鎮將赫連略行臺高
元榮大提尋死子念生代立僭稱天子年號天建置立百
官孝昌元年春正月徐州刺史元法僧據城反害行臺高

諒自稱宋王年號天啓遣其子景仲歸於蕭衍遣其將胡
龍牙成景雋元略等帥衆赴彭城詔祕書監安樂王鑒迴
師以討之鑒於彭城南擊元略大破之盡俘其衆旣而不
備爲元法僧所敗衍遣子豫章王綜入守彭城法僧擁其
寮屬守令兵戎及郭邑士女萬餘口南入夏四月辛卯皇
太后復臨朝攝政引羣臣面陳得失詔曰神龜之末權臣
擅命元乂劉騰陰相影響遂使皇太后幽隔後宮爲有無
君之心積習不臣之迹緣事彌彰蔽耳目之明專生殺之
柄天下爲之不康四郊由茲多壘此而可忍孰不可懷騰
身旣往可追削爵乂之罪狀誠合徽纒但以宗枝舅戚特
全弘貸之法可除名爲民秋八月詔斷遠近貢獻珠麗違
者免官九月詔減天下租調之半十二月山胡劉蠡升反
自稱天子置官寮二年春正月五原降戶鮮于脩禮反於

定州號魯興元年二月皇太后臨大夏門親覽冤訟六月
詔曰自運屬寇難歷載於茲烽驛交馳征鼓不息朕威德
不能遐被經略無以及遠俾是蒼生罹此荼炭何以苟安
黃屋無愧黔黎今便避居正殿蔬食素服當親自招募收
集忠勇有直言正諫之士敢決徇義之夫二十五日悉集
華林東門人別引見共論得失班告內外咸使聞知八月
賊元洪業斬鮮于脩禮請降為賊黨葛榮所殺都督爾朱
榮於肆州執刺史尉慶賓令其從叔羽生統州事九月葛
榮敗都督廣陽王淵章武王融於博野白牛邏去聲融歿於
陣榮自稱天子號曰齊國年稱廣安冬十一月杜洛周攻
陷幽州執刺史王延年及行臺常景丙午稅京師田租畝
五升借貸公田者畝一升閏月稅市人出入者各一錢店
舍為五等三年春正月葛榮陷般州刺史崔楷固執節死

之三月詔金紫光祿大夫源子邕為大都督討葛榮冬十
月以衛將軍討虜大都督尔朱榮為車騎將軍儀同三司
雍州刺史蕭寶寅據州反自號曰齊年稱隆緒武太元年
春正月定州為杜洛周所陷執刺史楊津是月皇女生祕
言皇子大赦改元二月帝崩於顯陽殿年十九皇子即位
大赦天下皇太后詔曰皇家握曆受圖年將二百祖宗累
聖社稷載安朕以寡昧親臨萬邦識謝塗山德慙文母屬
妖逆遞興四郊多故實望穹靈降祐麟趾象繁自潘充華
有孕椒宮翼誕儲貳而熊羆無兆唯虺遂彰于時以國步
未康假稱統微欲以底定物情係仰宸極何圖一旦弓劍
莫追國道中崩大行絕祀皇曾孫故臨洮王寶暉世子釗
體自高祖天表卓異大行平日養愛特深義齊若子事符
當璧及翌日弗愈大漸彌留乃延入青蒲受命玉几暨陳

衣在庭登策靡及允膺大寶即日踐祚朕是用惶懼忸怩
心焉靡訴今喪君有君宗祏惟固宜議賞卿士爰及百辟
凡厥在位並加陟敘幼主卽位儀同三司大都督爾朱榮
抗表請奔喪乃勒兵而入三月上尊謚曰孝明皇帝葬於
定陵廟號肅宗夏四月爾朱榮濟河皇太后幼主皆崩

太平御覽卷第一百三

太平御覽卷第一百四

皇王部二十九

後魏敬宗孝莊皇帝

節閔皇帝

廢帝安定王

孝武皇帝

文皇帝

廢帝

恭皇帝

東魏孝靜皇帝

敬宗孝莊皇帝

後魏書曰孝莊皇帝諱子攸彭城王勰音協之第三子母曰
李妃肅宗初以勰有魯陽翼衛之功封帝武城縣開國公
幼侍肅宗書於禁內及長風神秀慧姿貌甚美拜中書侍
郎城門校尉兼給事黃門侍郎雅爲肅宗所親待長直禁
中遷散騎常侍御史中尉孝昌二年八月進封長樂王轉
侍中中軍將軍及武太元年春二月肅宗崩大都督爾朱

六平雜覽 卷一百四
榮將兵向京師謀欲廢立以帝家有忠勳且兼人望陰與帝通榮乃帥眾來赴夏四月帝與兄弟夜北渡河會榮於河陽南濟河即帝位以兄彭城王紹爲無上王弟霸城公子正爲始平王榮爲侍中都督中外諸軍事大將軍尚書令領軍將軍領左右衛封太原王百僚相率有司奉璽綬備法駕奉迎於河梁車駕巡河西至陶渚榮以兵權在己遂有異志乃害靈太后及幼主次害無上王紹始平王子正公卿已下二千餘人列騎衛帝遷於便幕車駕入宮御太極殿大赦天下改武太爲建義元年是月汝南王悅北海王顥臨淮王彧前後奔蕭衍郢州刺史元顯達據城叛五月加大將軍爾朱榮北道大行臺以尚書右僕射元羅爲東道大使征東將軍光祿勳元欣副之循方黜陟先行後聞大將軍爾朱榮還晉陽帝餞於邙陰六月通直散騎

常侍高乾邕及弟帥合流民起兵於齊州之太原頻破州軍詔東道大使元欣喻旨乃降是月葛榮飢使其僕射任褒帥車三萬餘乘南寇至沁水幽州平北府主簿河間邢杲帥河北流民十餘萬戶反於青州之北海自署漢王年號天統詔諸有司馬仗從戎者職人優兩大階詔當親御六戎掃清燕代大將軍太原王爾朱榮帥精銳十萬爲左軍上黨王天穆摠眾八萬爲前軍司徒公楊椿勒兵十萬爲右軍司空公穆紹統卒八萬爲後軍是月葛榮眾退屯相州之北七月齊獻武王於鄴西北招慰葛榮別帥稱王者七人眾萬餘降之加大將軍爾朱榮柱國大將軍錄尚書事光州人劉舉聚眾數千反於濮陽自稱皇武大將軍是月高平鎮人万俟墨其醜二音僭大位署百官八月葛榮帥眾圍相州九月詔太尉公上黨王天穆討葛榮次於朝

歌以征東將軍齊州刺史元欣爲沛郡王柱國大將軍爾
朱榮率騎七千討葛榮於滏口破擒之餘衆悉降冀定滄
瀛殷五州平大赦天下已改爲永安元年以柱國大將軍
太原王爾朱榮爲大丞相都督河北畿外諸軍事冬十月
蕭衍以北海王顥爲魏主年號孝基入據南兗之鉅音城
二年夏四月上黨王天穆齊獻武王大破邢杲於齊州之
濟南杲降送京師五月元顥尅梁國內外戒嚴癸酉元顥
陷滎陽甲戌夜車駕北巡幸河內景子元顥入洛戊寅太
原王爾朱榮會車駕於長子即日反旆上黨王天穆北渡
河會車駕於河內秋七月都督爾朱兆賀拔勝從硤石夜
濟破顥子冠受及安豐王延明軍元顥敗走車駕入居華
林園昇大夏門大赦天下宴勞天柱大將軍爾朱榮上黨
王天穆及北平來督將於都亭出宮人三百繒錦雜綵數

萬疋班賜有差三年春三月雍州刺史爾朱天光討醜奴
蕭寶寅於安定破擒之囚送京師六月嘯噓國獻師子九
月天柱大將軍爾朱榮上黨王天穆自晉陽來朝帝殺榮
及天穆於明光殿大赦天下遣武衛將軍奚毅前燕州刺
史崔淵帥衆鎮北中是夜左僕射爾朱世隆榮妻鄉郡長
公主帥榮部曲焚西陽門出屯河陰攻河橋擒毅等屠害
之據北中城南逼京邑十月通直散騎常侍假平西將軍
都督李苗以火船焚河橋爾朱世隆退走壬寅爾朱世隆
停建興之高都爾朱兆自晉陽來會之共推太原太守行
并州刺史長廣王曄爲主大赦所部號年建明十二月爾
朱兆寇丹谷都督崔伯鳳戰歿都督羊文義史五龍降兆
大都督源子恭奔退爾朱兆爾朱度律自富平津上率騎
涉渡以襲京城事出倉卒禁衛不守帝步出雲龍門兆逼

太平御覽 卷一百四 三
帝幸永寧之佛寺殺皇子亂兵殺司徒公臨淮王彧僕射
范陽王誨戊申元暉大赦天下爾朱度律自鎮京師爾朱
兆遷帝於晉陽崩於城內三級佛寺時年二十四中興二
年謚爲武懷皇帝太昌元年又謚孝莊皇帝廟號敬宗葬
靜陵

節閔皇帝

後魏書曰節閔皇帝諱恭字脩業廣陵惠王之子也母曰
王氏王少端謹有志度長而好學事祖母嫡母以孝聞正
始中襲爵延昌中拜通直散騎常侍正光三年加散騎常
侍領給事黃門侍郎以元叉擅權遂稱疾不起久之因託
瘖病五年就除金紫光祿大夫建義元年除儀同三司既
絕言垂將一紀居於龍華佛寺無所交通永安末有白莊
帝者言王不語將有異圖民間遊聲又云有天子之氣王

懼禍逃匿上洛尋見追躡執送京師拘執多日以無狀獲
免及莊帝崩爾朱世隆等以元暉疎遠又非人望所推以
王潛嘿晦身有過人量將謀廢立恐實不語乃令王所親
申其意旨且兼迫脅王遂荅曰天何言哉世隆等大悅春
三月暉進至邙南世隆等奉王東郭之外行禪讓之禮太
尉公爾朱度律進重綬袞冕之服及就輅車百官侍衛入
自建春雲龍門昇太極殿前羣臣拜禮畢遂登闔闔門詔
大赦天下以魏爲大魏改建明二年爲普泰是月幽州刺
史劉靈助起兵於薊撫軍將軍金紫光祿大夫兼侍中河
北大使高乾邕及弟平北將軍通直散騎常侍高敖曹率
衆夜襲冀州執刺史元崑魚力共推前河內大守封隆之
行州事三月封長廣王爲東海王潁川王爾朱兆爲天柱
將軍晉州刺史平陽郡開國公高歡封勃海信都王夏四

月詔有司不得復稱偽梁罷細作之條無禁鄰國還往高歡以爾朱逆亂始興義兵於信都西定殷州斬其刺史爾朱羽生南趙郡太守李元忠爲刺史鎮廣阿八月追尊皇考爲先帝皇妣爲先太妃封皇弟永業爲高密王皇子子恕爲青州渤海王旣而高歡推立安定王爲帝於信都二年三月高歡敗爾朱天光等於韓陵夏四月高歡使魏蘭根慰喻洛邑且觀帝之爲人蘭根忌帝雅德還致毀謗音從崔懷陵議廢帝於崇訓佛寺而立平陽王脩是爲孝武帝五月帝殂於門下外省時年三十孝武帝詔百司赴會大鴻臚監護葬事用王禮加以九旒轡輅黃屋左纛班劍百二十人後西魏追謚節閔皇帝

後廢帝安定王

後魏書曰後廢帝諱朗字仲哲章武王融第三子也母曰

程氏少稱明悟永安二年爲肆州魯郡王後軍府司馬元暉之建明二年正月爲冀州勃海太守及高歡起義兵將誅暴逆乃推載之冬十月卽皇帝位於信都城西升壇柴燎大赦稱中興元年以高歡爲侍中丞相都督中外諸軍事大將軍錄尚書大行臺增邑三萬戶以兼侍中撫軍將軍河北大使高乾邕爲侍中司空以前平北將軍通直散騎常侍高敖曹爲驃騎大將軍儀同三司冀州刺史以終其身十一月高歡率師攻鄴城二年春正月拔鄴擒刺史劉誕二月以高歡爲大丞相柱國大將軍太師增封三萬戶并前爲六萬戶三月以齊文襄王起家爲驃騎大將軍儀同三司車駕幸鄴閏月爾朱天光兆度律仲遠等屯於洹水之南高歡出頓紫陌爾朱兆率輕騎三千夜襲鄴城叩西門不尅退走高歡大破爾朱天光等四胡於韓陵前

廢帝鎮軍將軍質拔勝徐州刺史杜德於陣降爾朱兆走并州仲遠奔東郡天光度律將赴洛陽大都督斛斯椿賈顯智倍道先還夏四月椿等據河橋懼罪自劾尋擒天光度律於河橋西北太行臺長孫稚都督賈顯智等率騎入京師執爾朱世隆彥伯斬於都街口送天光度律於高歡爾朱仲遠奔蕭衍車駕至河陽仍遜於別邸太昌元年五月封安定郡王邑一萬戶後以罪殂於門下外省時年二十永熙二年葬鄴西南野馬崗

孝武皇帝

後魏書曰孝武皇帝諱脩字孝則廣平武穆王懷之第三子母曰李氏性沉厚少言好武始封汝陽縣公拜通直散騎侍郎轉中書侍郎建義初除散騎常侍尋遷平東將軍兼太常卿又爲鎮東將軍宗正卿永安三年封平陽王普

泰初轉侍中鎮東將軍儀同三司兼尙書左僕射又加侍中尙書右僕射中興二年夏四月安定王自以疎遠未允四海之心請遜大位齊獻武王高歡與百察會議僉謂高祖不可無後乃共奉王即帝位於東郭之外自東陽雲龍門御太極前殿羣臣朝賀禮畢升闔闔門大赦天下改中興二年爲太昌元年帝以世易除復齊獻武王爲太丞相大將軍還鄴車駕餞別於乾脯山殺大司馬汝南王悅大赦天下改太昌爲永興以同太宗時號尋改爲永熙二年春正月車駕幸崧高石窟靈巖寺十二月車駕狩於嵩陽遂幸溫湯車駕還宮三年春二月壬戌大赦壬午封左衛將軍元斌之爲潁川王夏四月癸丑日有蝕之五月丙戌置勳府庶子箱別六百人騎官箱別二百人閣內部曲數千人帝內圖高歡乃以斛斯椿爲領軍使與王思政等統

九平御覽 卷一百四 六
之以爲心膂軍謀朝政咸決於椿分置督將及河南關西諸刺史辛卯下詔戒嚴揚聲伐梁實謀北討秋七月己丑帝親總六軍率南陽王寶炬清河王亶廣陽王湛斛斯椿以五千騎宿於灑西陽王別舍沙門都維那惠臻負璽持千牛刀以從有牛百頭盡殺以食軍士衆知帝將出其夜亡者過半清河廣陽二王亦逃歸略陽公宇文泰遣都督駱超李贇和各領數百騎赴駱超先至甲戌贇和會帝於嶠中己酉高歡入洛遣疋婁昭及河南尹元子思領左右侍官追帝請迴駕高昂率勁卒及帝於陝西帝揚鞭長驚至湖城飢渴甚有王思村人以麥飯壺漿獻帝甘之復一村十年帝至稠桑潼關大都督毛洪賓迎獻食八月宇文泰遣大都督趙貴梁禦甲騎二千來赴乃奉迎帝過河謂禦曰此水東流而朕西上若得重謁洛陽廟是卿等功也

帝及左右皆流涕宇文泰迎於東陽帝勞之將士皆呼萬歲遂入長安以雍州公廡爲宮大赦甲寅高歡推司徒清河王亶爲大司馬承制惣萬機居尚書省歡追車駕至潼關九月己酉歡東還洛陽帝親督衆攻潼關斬其行臺華長瑜冬十月高歡推清河王亶子善見爲主徙都鄴是爲東魏魏於此始分爲二十二月帝崩時年二十五謚曰孝武葬雲陵

文皇帝

後魏書曰文皇帝諱寶炬孝文皇帝之孫京兆王愉之子也母曰楊氏帝正始初坐父愉罪兄弟皆幽宗正寺及宣武崩乃得雪正光中拜直閣將軍時胡太后嬖寵帝與明帝謀誅之事泄免官武泰中封邵縣侯永安三年進封南陽王孝武即位拜太尉加侍中承熙二年進位太保開府

尚書令三年孝武與高歡構難以帝爲中軍四面大都督及從入關拜太宰錄尚書事孝武崩丞相略陽公宇文泰率羣公卿士奉表勸進三讓乃許焉大統元年春三月戊申帝卽位於城西人赦改元追尊皇考爲文景皇妣楊氏爲后己酉進丞相略陽公宇文泰都督中外諸軍錄尚書事大行臺改封安定郡公以尚書令斛斯椿爲太保廣平王贊爲司徒乙卯立妃乙氏爲皇后二年春正月辛亥祀南郊改以神元皇帝配東魏攻陷夏州三年冬十月安定公宇文泰大破東魏軍於沙苑拜泰柱國大將軍四年春正月辛酉拜天於清暉室終帝世遂爲常二月東魏攻陷南汾潁豫廣四州廢皇后乙氏三月立蠕蠕而蠢女都九閭氏爲皇后大赦秋七月東魏將侯景等圍洛陽帝與安定公宇文泰東伐九月車駕至自東伐五年冬十月於陽

武門外懸鼓置紙筆以求得失六年春正月庚戌朝羣臣自西遷至此禮樂始備七年十二月御憑雲觀引見諸王敘家人之禮手詔爲宗誠十條以賜之八年春三月初置六軍十六年五月東魏靜帝遜位於齊秋七月安定公宇文泰東代至恒農齊師不出乃還九月大赦十七年春正月庚戌帝崩於乾安殿時年四十五葬於永陵謚曰文皇帝

廢帝

後魏書曰廢帝名欽文皇帝之長子也母日乙皇后大統元年正月乙卯立爲皇太子十七年三月卽皇帝位二年秋八月大將軍尉遲迥尅成都劔南平冬十一月安定公宇文泰殺尚書元烈三年正月安定公宇文泰廢帝而立齊王廓帝自元烈之誅有怨言淮安王育廣平王贊等並

垂泣諫帝不聽故及於辱

恭皇帝

後魏書曰恭皇帝諱廓文帝之第四子也大統十四年封為齊王廢帝三年正月即皇帝位改元十一月師滅梁戕上良切梁元帝梁太尉王僧辨奉元帝子方智為王承制居建業三年春正月丁丑初行周禮建六官以安定公宇文泰為太師冢宰以柱國李弼為大司徒以趙貴為太保大宗伯以尚書令獨孤信為大司馬以于謹為大司寇以侯莫陳崇為司空冬十月乙亥安定公宇文泰薨十二月庚子帝遜位於周閔帝元年正月東魏封帝為宋公尋殂

東魏孝靜皇帝

後魏書曰孝靜皇帝諱善見清河文宣王亶之世子也母曰胡妃永熙三年拜通直散騎侍郎秋八月為驃騎大將

軍開府儀同三司孝武既入關渤海王高歡奉迎不克乃與百僚會議推帝以奉肅宗之後時年十一冬十月即位大赦天下改永熙三年為天平元年有事於太廟詔曰安能遷自古之明典所居靡定往昔之成規是以躬遷入城周卜三地吉凶有數隆替無恒事由於通變理出於不得已故也高祖孝文皇帝式觀乾象俯協人謀發自武州來幸嵩縣魏雖舊國其命惟新及正光之季國步孔棘喪亂不已寇賊相侵俾我生民無所措手今遠尊古式深驗時事考宅襲吉遷龜漳溢庶克隆洪基再昌寶曆主者明為條格及時發邁車駕北遷詔渤海王高觀留後部分以衛軍大將軍尚書令元弼為驃騎大將軍儀同三司洛州刺史鎮洛陽十一月車駕幸鄴是冬肅衍以元慶和為鎮北將軍魏王入據平瀨鄉孝武崩於長安二年春正月渤

海王高歡襲擊山胡劉蠡升大破之詔以高歡爲相國假黃鉞劍履上殿入朝不趨王固讓不受三月高歡討劉蠡升斬之蠡子南海王復僭帝號高歡進擊破擒之及其弟西海王皇后夫人王公已下四百餘人并獲逋逃之民二萬餘戶八月發七萬六千人營新宮十二月車駕狩於鄴是歲西魏文帝大統元年三年春正月詔加渤海王高歡九錫之禮遣侍中元子思敦喻固讓乃止二月詔加渤海王世子澄使持節尚書令大行臺大都督秋七月大赦天下四年夏四月遷七帝神主入新廟大赦天下先是蕭衍請通好冬十月西魏遣其大行臺元季海大都督獨孤如願逼洛州行軍事廣陽王湛弃城退還季海如願遂據金墉潁川長史賀若微執刺史田迅西叛引西魏都督梁廻據城西魏又遣其都督趙繼宗右丞韋孝寬等攻陷豫

州大象元年春正月巨象至自傷郡陂中南兗州獲送鄴大赦改年大都督賀拔仁攻西魏南汾州拔之率豫州刺史堯雄等與大行臺侯景司徒高敖曹大都督万俟受洛于等於北豫相會俱討潁州梁廻等棄城遁走潁州平秋七月行臺侯景司徒高敖曹圍西魏將獨孤如願於金墉城八月大敗西魏於河陰司徒高敖曹儀同三司大都督李猛宗顯並戰歿西魏留其將長孫子彥守金墉渤海王高歡濟河子彥棄城走興和元年五月立皇后高氏大赦天下秋七月詔渤海王高歡爲相國錄尚書事大行臺固辭相國九月發畿內民夫十萬人城鄴城四十日罷十一月以新宮成大赦改元二年春正月徙新宮大赦天下三年冬十月詔羣官於麟趾閣議定新制班於天下發夫五萬人築漳濱堰四年夏五月渤海王高歡請令百官月一

太平御覽 卷一百四
面敷政事明揚仄陋納諫屏邪親理獄訟武定元年春正月大赦改年車駕蒐於邯鄲之西山三月渤海王高歡討宇文黑獺於邙山大破之擒西魏臨洮王森蜀郡王榮宗江夏王昇鉅鹿王闡譙郡王亮追奔至恒農而還豫洛二州平二年春正月渤海王高歡請在并州置晉陽宮以處配沒之口三月渤海王世子高澄爲大將軍五年春正月渤海王高歡薨於晉陽司徒侯景反潁州刺史司馬世雲以城附之景入據潁城誘執豫州刺史高元成廣州刺史暴顯等司空韓軌驃騎大將軍儀同三司賀拔仁驃騎大將軍儀同三司可朱渾道元左衛將軍劉豐等率衆討之景乃遣使降於西魏請師救援西魏遣使將李景和王思政帥騎赴之思政等入據潁州景乃出走豫州侯景復背西魏歸於蕭衍衍置景爲河南王大將軍承制六月司徒

韓軌司空可朱渾道元等自潁州班師大將軍高澄迎勞於石濟高澄還晉陽秋七月以大將軍高澄爲使持節大丞相都督中外諸軍事錄尚書事大行臺渤海王九月蕭衍遣其兄子貞陽侯淵明率衆寇徐州堰泗水於寒山以灌彭城冬十月以尚書左僕射慕容紹宗爲東南道行臺與驃騎大將軍儀同三司大都督高岳潘相樂討淵明十一月大破之擒淵明及其二子六年正月大都督高岳等戰於渦陽大破侯景俘斬五萬餘人其餘溺於渦水水爲之不流景走淮南冬十月侯景濟江推蕭衍弟子臨賀王正德爲主以改建業蕭衍弟子北徐州刺史中山侯蕭正表以鍾離內屬三月侯景尅建業還以蕭衍爲主衍弟子北徐州刺史定襄侯蕭祗湘潭侯蕭退來降夏四月詔渤海王高澄綠綬讚拜不名入朝不趨劔履上殿是月侯

景殺蕭衍立子綱為主六月尅潁州擄西魏大將軍尚書左僕射東道大行臺太原郡開國公王思政潁州刺史皇甫僧顯及戰士男女數萬口八月盜殺渤海王高澄甲午太原公高洋如晉陽八年春正月帝為渤海王高澄舉哀於東堂詔太原公高洋嗣事三月進爵為齊王夏五月詔齊王為相國摠百揆進備九錫之禮以齊國大妃為王太后王妃為王后詔歸帝位於齊國即日遜於別宮齊天保元年封中山王二年冬十二月殂時年二十八謚曰孝靜皇帝葬於漳西山岡

太平御覽卷第一百四

太平御覽卷第一百五

皇王部三十

後周太祖文皇帝

明皇帝

宣皇帝

後周太祖文皇帝

孝閔皇帝

武皇帝

靜皇帝

周書曰太祖文皇帝姓宇文氏諱泰字黑獺代郡武川人其先出自炎帝炎帝為黃帝所滅子孫遁居朔野有葛鳥兔者雄武多策略鮮卑慕之奉以為主遂摠十二部落世為大人其後裔孫曰普回因狩得玉璽三紐有文曰皇帝璽普回異之以為天授其俗謂天子曰宇文因號宇文國并以為氏焉太祖德皇帝之少子也母曰王氏初孕五月夜夢抱子昇天纔不至而止寤而告德皇帝德皇帝喜曰

雖不至天貴亦極矣魏孝昌二年燕州亂太宗始以統軍從爾朱榮征之先是北海王顥奔梁梁人立爲魏王令率兵入洛魏孝莊帝出居河內以避之榮遣賀拔岳討顥仍迎孝莊帝太祖與岳有舊乃以別將從岳及孝莊帝反正以功封寧都子邑三百戶遷鎮遠將軍步兵校尉音上侯音祖遂從岳入關先鋒破魏行臺尉遲菩薩等及平醜奴定隴右太祖功居多遷征西將軍金紫光祿大夫增邑三百戶加直閭將軍行原州事太昌元年岳以太祖爲左丞領岳府司馬加散騎常侍事無巨細皆委決焉表太祖爲持節武衛將軍夏州刺史魏永熙三年正月岳與侯莫陳悅討曹泥二月岳爲悅所害四月太祖率輕騎臨悅軍悅大懼太祖驅兵奮擊大破之悅遁走追及斬之魏帝遣著作

郎姚幼瑜持節勞軍進太祖侍中驃騎大將軍開府儀同三司關西大都督洛陽縣公承制封拜使持節如故七月丁未從帝洛陽率輕騎入關太祖備儀衛奉迎謁見東陽驛八月齊神武襲陷潼關侵華陰太祖率諸軍屯霸上以待之齊神武留其將薛瑾守關而退太祖乃進軍襲瑾虜其卒七千還長安進位丞相冬十月齊神武推魏清河王亶子善見爲主徙都於鄴是爲東魏閏十二月魏孝武帝崩太祖立魏南陽王寶炬爲嗣是爲文皇帝大統十七年春三月魏文帝崩皇太子嗣位太祖以冢宰揔百揆三年魏帝有怨言魏臨淮王育廣平王贊等垂泣諫之帝不聽於是太祖與公卿定議廢帝立齊王廓是爲恭帝元年夏四月帝大饗群臣魏史柳虬執簡書告於朝曰廢帝文皇帝之嗣子年七歲文帝託於安定公曰是子也才由于公

不才亦由于公公宜勉之公既受茲重寄居元輔之任又
納女爲皇后遂不能訓誨有成致令廢黜負文皇帝付囑
之意此咎非安定公而誰太祖乃令太常盧辯作誥諭公
卿曰嗚呼我群后暨衆士維文皇帝以襁褓之嗣託於予
訓之誨之庶厥有成而予罔能弗變厥心庸暨乎廢墜我
文皇帝之志嗚呼茲咎予其焉避予實知之矧爾衆人之
心哉惟予之顏豈惟今厚將恐來世以予爲口實乙亥魏
帝詔封太祖子邕爲輔城公憲爲安城公邑各二千戶三
年九月太祖有疾還至雲陽命中山公護受遺輔嗣子冬
十月乙亥崩於雲陽宮還長安發喪時年五十三葬于成
陵謚日文公孝閔帝受禪追尊爲文王廟曰太祖武成元
年追爲文皇帝

孝閔皇帝

後周書曰孝閔皇帝諱覺字陁羅尼太祖第三子也母曰
元皇后大統八年生於同州七歲封略陽郡公時有善相
者史元華見帝退謂所親曰此公子有至貴之相但恨其
壽不足以稱之耳魏恭帝三年三月命爲安定公世子十
月乙亥太祖崩景子世子嗣位爲太師大冢宰十二月丁
亥魏帝詔以岐陽之地封帝爲周公庚子禪位於帝元年
春正月辛丑卽天王位柴燎告天朝百官於路門追尊皇
考文公爲文王皇妣爲文后大赦天下封魏帝爲宋公帝
性剛果見晉公護執政深忌之司會李植軍司馬孫恒以
先朝佐命入侍左右亦疾護權重乃與宮伯乙弗鳳賀拔
提等潛謀請帝誅護帝然之又引宮伯張光洛同謀光洛
密白護護乃出植爲梁州刺史恒爲潼州刺史鳳等遂不
自安更奏帝將召群臣入因此誅護光洛又白之時小司

馬尉遲綱摠統宿衛兵護乃召綱共謀廢立令綱入殿中詐呼鳳等論事既至以次執送護第並誅之綱乃罷禁兵帝方悟無左右獨在內殿令宮人持兵自守護又遣大司馬賀蘭祥逼帝遜位遂幽於舊邸月餘以弑崩時年十六護誅後謚曰孝閔皇帝陵曰靖陵

明皇帝

後周書曰世宗明皇帝諱毓小名統萬突太祖長子也母曰姚夫人永熙三年太祖臨夏州生帝於統萬城因以名焉大統十四年封寧都郡公十六年行華州事尋拜開府儀同三司宜州諸軍事宜州刺史魏恭帝三年授大將軍鎮隴右孝閔踐祚進位柱國轉岐州諸軍事岐州刺史治有美政黎民懷之及孝閔帝廢晉公護遣使迎帝於岐州秋九月癸亥至京師止於舊邸甲子羣臣上表勸進備法

駕奉迎帝固讓群臣固請是日即天王位大赦天下乙丑朝群臣於延壽殿武成元年春正月乙酉太師晉公護上表歸政帝始親覽萬機軍旅之事護猶摠焉初改都督諸州軍事爲摠管八月己亥改天王稱皇帝追尊文王爲文皇帝大赦改元二年春正月癸丑朔大會羣臣於紫極殿始用百戲三月辛酉重陽閣成會群公列將卿大夫及突厥使者於芳林園賜錢帛各有差夏四月帝因食遇毒庚子大漸辛丑崩於延壽殿時年二十七謚曰明皇帝廟稱世宗葬昭陵

武皇帝

後周書曰高祖武皇帝諱邕字禰羅突太祖第四子母叱奴太后大統九年生於同州有神光照室幼而孝敬聰敏有器質太祖異之曰成吾志者必此兒也年十二封輔城

郡公孝閔帝踐祚拜大將軍出鎮同州世祖即位遷柱國授蒲州諸軍事蒲州刺史武成元年入爲大司空治御正進封魯國公領宗師甚爲世宗所親愛朝廷大事多共參議性沉深有遠識非因顧問終不輒言世宗每歎曰夫人不言言必有中武成二年世宗崩遺詔傳位於帝帝固讓百官勸進乃從之壬寅卽皇帝位大赦天下保定元年春正月戊申詔曰寒暑亟周奄及徂歲改元命始國之典章朕承寶圖宜遵故實可改武成三年爲保定元年嘉號旣新惠澤宜溥文武百官各增四級以大象宰晉國公護爲都督中外諸軍事四年十月詔大將軍大象宰晉國公護率軍伐齊齋於太廟庭授以斧鉞於是護搃大軍出潼關大將軍權景宣率山南諸軍出豫州少師楊標出軹關天和元年正月大赦改元五月甲午詔曰道德交喪禮義嗣

興壞四始於一言美三千於爲敬是以在上不驕處滿不溢富貴所以長守邦國於焉又安故能承天靜地和民敬鬼明並日月道合四時朕雖庸昧有志前古甲子乙卯禮云不樂萇弘表昆吾之稔杜蕢音惟有揚解音實之文自世道喪亂禮儀紊毀此典茫然已墜于地昔周王受命請聞顯頊廟有戒盈之器室爲復禮之銘矧伊末學而能忘此宜依是日省事停樂庶知爲君之難爲臣不易貽之後昆般鑿斯在四年春正月辛卯朔廢朝以齊武成薨故也遣司會河陽公李綸等會葬於齊仍弔賻焉建德元年三月癸卯朔日有蝕之齊遣使來聘景辰誅大象宰晉國公護其子柱國譚國公會會弟大將軍莒國公至崇業公靜并柱國侯伏侯龍恩龍恩弟大將軍萬壽大將軍劉勇等大赦改元罷中外府二年秋七月己巳祠太廟自春末不雨

至於是月壬辰集百寮於大德殿帝責躬罪已問以治政得失五年十月己酉帝搃戎東伐以越王盛爲右一軍搃管杞國公亮爲右二軍搃管隋國公楊堅爲右三軍搃管譙王儉爲左一軍搃管大將軍竇泰爲左二軍搃管廣化公丘崇爲左三軍搃管齊王憲陳王純爲前軍六年春正月尉遲勤擒齊主及其太子恒於青州四月乙巳至自東伐列齊主於前其王公等並從車輦旗幟及器物以次陳於其後大駕布六軍備凱樂獻俘於太廟京邑觀者皆稱萬歲戊申封齊主爲溫國公宣政元年三月於蒲州置宮廢同州及長春二宮甲戌初服常冠以皂紗爲之加簪而不施纓道其制若今之折角巾也上大將軍郟國公王軌破陳師於呂梁擒其將吳明徹等俘斬三萬餘人五月己丑帝搃戎北伐遣柱國平原公姬願東平公宇文弼舉等

率軍五道俱入發關中公私馬驢悉從軍癸巳帝不豫止於雲陽宮丙申詔停諸軍事六月丁酉帝疾甚還京其夜崩乘輿時年三十六謚曰武皇帝廟稱高祖葬孝陵

宣皇帝

後周書曰宣皇帝諱贇字乾伯高祖長子也母曰李太后武成元年生於同州保定元年五月景午封魯國公建德元年四月癸巳高祖親告廟冠於阼階立爲皇太子詔皇太子巡撫西土文宣皇后崩高祖諒闇詔太子搃朝政五旬而罷高祖每巡幸四方太子常留監國五年二月又詔皇太子巡西土因討吐谷渾宣政元年六月丁酉高祖崩戊戌太子即皇帝位尊皇后爲皇太后大象元年春正月癸巳受朝於露門帝服通天冠絳紗袍群臣皆服漢魏衣冠大赦改元大成初置四輔官以上柱國大冢宰越王盛

爲大前疑相州摠管蜀國公尉遲迥爲大右弼申國公李穆爲大左輔大司馬隋國公楊堅爲大後丞二月辛巳詔日皇太子衍地居上嗣正統所歸遠憑積德之休允協無疆之祚帝王之量不肅而成天祿之期不謀已至朕今傳位於衍乃瞻四海深合謳歌之望俾予一人高蹈風塵之表萬方兆庶知朕意焉可大赦天下改大成元年爲大象元年帝於是自稱天元皇帝所居稱天臺冕二十有四旒車服旂鼓皆以二十四爲節內史御正皆置上大夫皇帝衍稱正陽宮置納言御正諸衛等官皆准天臺尊皇太后爲天元皇太后二年五月甲午夜帝備法駕幸天興宮乙未帝不豫還宮詔隋國公堅入侍疾己酉大漸御正下大夫劉昉與內史上大夫鄭譯矯制以隋國公堅受遺輔政是日帝崩於天德殿時年二十二謚曰宣皇帝葬定陵

靜皇帝

後周書曰靜皇帝諱衍後改爲闡宣帝長子也母曰朱皇后建德二年六月生於東宮大象元年正月癸卯封魯王戊午立爲皇太子二月辛巳宣帝於鄴宮傳位授帝居正陽宮二年夏五月乙未宣帝寢疾詔帝入宿於露門學己酉宣帝崩帝入居天臺廢正陽宮大赦天下停洛陽宮作大定元年春正月壬午詔曰朕以不天夙遭極罰光陰遒速遽及此辰窮慕纏綿言增號絕踰祀革號憲章前典可改大象三年爲大定元年二月庚申大丞相隋王楊堅爲相國摠百揆備九錫之禮又加冕十有二旒建天子旌旗出警入蹕並依魏晉故事甲子隋王楊堅稱尊號帝遜於別宮隋氏奉帝爲介國公邑萬戶車服禮樂一如周制上書不爲表答不稱詔有其文事竟不行開皇元年五月壬

申崩時年九歲謚曰靜皇帝葬恭陵

太平御覽卷第一百五

隋書曰高祖文帝姓楊氏諱堅弘農郡華陰人也漢太尉震八代孫鉉仕燕為北平太守鉉生元壽後魏代為武川鎮司馬子孫因家焉元壽生太原太守惠嘏惠嘏生平原太守烈烈生寧遠將軍禎禎生忠忠即皇考也皇考從周太祖起義關西賜姓普六茹氏位至柱國大司空隋國公薨贈太保謚曰栢皇妣呂氏以大統七年六月癸丑夜生高祖於馮翊般若寺紫氣充庭有尼來自河東謂皇妣曰此兒所從來甚異不可於俗閒處之尼將高祖舍於別館躬自撫養皇妣嘗抱高祖忽見頭上角出遍體鱗起皇妣

太平御覽卷第一百六

皇王部三十一

隋高祖文皇帝

煬皇帝

隋書曰高祖文帝姓楊氏諱堅弘農郡華陰人也漢太尉

震八代孫鉉仕燕為北平太守鉉生元壽後魏代為武川鎮司馬子孫因家焉元壽生太原太守惠嘏惠嘏生平原太守烈烈生寧遠將軍禎禎生忠忠即皇考也皇考從周太祖起義關西賜姓普六茹氏位至柱國大司空隋國公薨贈太保謚曰栢皇妣呂氏以大統七年六月癸丑夜生高祖於馮翊般若寺紫氣充庭有尼來自河東謂皇妣曰此兒所從來甚異不可於俗閒處之尼將高祖舍於別館躬自撫養皇妣嘗抱高祖忽見頭上角出遍體鱗起皇妣

大駭墜高祖於地尼自外入見曰已驚我兒致今晚得天
下爲人龍顏額有五柱入頂目光外射有文在手曰王長
上短下沉深嚴重初入太學雖至親暱不敢狎也年十四
京兆尹薛善辟爲功曹十五以太祖勳授散騎常侍車騎
大將軍儀同三司封成紀縣公武帝即位遷左小宮伯出
爲隋州刺史進位大將軍後徵還遇皇妣寢疾三年晝夜
不離左右世稱純孝宇文護執政尤忌高祖屢將害焉大
將軍侯伏侯壽等匡護得免其後襲爵隋國公武帝娉高
祖長女爲皇太子妃益加禮重齊王憲言於帝曰普六茹
堅相貌非常臣每見之不覺自失恐非人下請早除之帝
曰此止可爲將耳內史王軌驟言於帝曰皇太子非社稷
主普六茹堅見有反相帝不悅曰必天命有在將若之何
高祖甚懼深自晦匿建德中率水軍三萬破齊師於河橋

明年從帝平齊進位柱國與宇文憲破齊任城王高潛於
冀州除定州摠管宣帝卽位以后父徵拜上柱國大司馬
大象初遷太後丞右司武俄轉大前疑帝每巡幸恒委以
居守大象二年五月以高祖爲楊州摠管將發暴有足疾
不果行乙未宣帝崩時靜帝幼冲未能親理政事內史大
夫鄭譯御正大夫劉昉以高祖皇后之父衆望所歸遂矯
詔引高祖入摠朝政都督內外諸軍事周氏諸王在藩者
高祖恐其生變稱趙王招將嫁女於突厥爲詞以徵之丁
未發喪庚戌周帝拜高祖假黃鉞左丞相百官摠己而聽
焉十二月甲子周帝詔以郢州之漢東二十郡爲隋國劍
履上殿入朝不趨贊拜不名備九錫之禮加璽紱遠遊冠
相國印綬綬綬位在諸王上隋國置丞相已下一依舊式
高祖再讓不許於是建臺置官大定元年二月丙辰詔王

大平御覽 卷一百六 二
冕十有二旒建天子旌旗出警入蹕乘金根車駕六馬備
五時副車置旄頭雲罕樂舞八佾設鐘簾宮懸王妃爲王
后長子爲太子前後三讓乃授俄而周帝以衆望有歸乃
下詔遣大宗伯大將軍金城公趙熹奉皇帝璽綬百官勸
進高祖乃受焉開皇元年二月甲子上自相府常服入宮
備禮即皇帝位於臨光殿設壇於南郊遣使柴燎告天是
日大赦改元爲開皇六月癸未詔以初受天命赤雀降祥
五德相生赤爲火色其郊及社廟依服冕之儀而朝會之
服旗幟犧牲各令尚赤戎服以黃秋七月乙卯上始服黃
百寮畢賀二年六月景申詔曰龍首山川原秀麗卉物滋
阜卜食相土宜建都邑定鼎之基永固無窮之業所在公
私府宅規模遠近營構資費隨事條奏仍詔左僕射高顛
將作大匠劉龍鉅鹿郡公賀婁于幹太府少卿高龍義等

創造新都三年春正月庚子將入新都大赦天下六年二
月丁亥發丁男十一萬修築長城二旬而罷七年春正月
癸巳有事於太廟乙未制諸州歲貢三人丁巳祀朝日於
東郊己巳陳遣兼散騎常侍王亨兼通直散騎常侍王脊
來聘壬申車駕幸醴泉宮是月發丁男十萬餘修築長城
二旬而罷夏四月己酉幸晉王第庚戌於揚州開山陽壇
以通運漕八年冬十月甲子將伐陳有事於太廟命晉王
廣秦王俊清河公楊素並爲行軍元帥以伐陳九年春正
月己巳白虹夾日辛未賀若弼拔陳京口韓擒虎拔陳南
豫州癸酉以尚書右僕射虞慶則爲右衛大將軍景子賀
若弼敗陳師於蔣山獲其將蕭摩訶韓擒虎進師入建業
獲其將任蠻奴獲陳主叔寶陳國平得州三十郡一百縣
四百癸巳遣使持節巡撫之夏四月己亥幸驪山親勞旋

師乙巳三軍凱入獻俘於太廟拜晉王廣爲太尉五月己卯以吏部尚書蘇威爲尚書右僕射六月乙丑以荊州總管楊素爲納言丁丑以吏部侍郎盧愷爲禮部尚書時朝野物議咸願登封秋七月景午詔曰豈可命一將軍除一小國遐邇注意便謂太平予以薄德而封名山用虛言而干上帝非朕攸聞而今以後言及封禪宜卽禁絕二十年冬十月乙丑皇太子勇及其諸子並廢爲庶人殺柱國太平縣公史萬歲己巳殺左衛大將軍五原郡公元旻十一月戊子天下地震京師大風雪以晉王廣爲皇太子十二月戊午詔東宮官屬不得稱臣於皇太子仁壽元年春正月乙酉朔大赦改元以尚書右僕射楊素爲尚書左僕射納言蘇威爲尚書右僕射丁酉徙河南王昭爲晉王三年七月詔令州縣搜揚賢哲皆取明知今古通識治亂究政

教之本達禮樂之源不限多少不得不舉限以三旬咸令進路徵召將送必須以禮四年春正月景辰大赦甲子幸於仁壽宮乙丑詔賞罰支度事無巨細並付皇太子夏四月乙卯上不豫六月庚申大赦天下八月甲辰上疾甚卧於仁壽宮與百寮辭訣並握手歔歔是時唯太子及陳宣華夫人侍疾太子無禮宣華訴之帝怒曰死狗那堪付後事遽令召勇楊素祕不宜乃屏左右令張衡入拉帝血濺屏風冤痛之聲聞于外年六十四在位二十四年史臣曰高祖龍德在田奇表見異晦明藏用故知我者稀始以外戚之尊受託孤之任與能之議未爲當時所許是以周室舊臣咸懷憤惋旣而王謙固三蜀之阻不踰朞月尉遲迥舉全齊之衆一戰而亡斯乃非止人謀抑亦天之所贊也乘茲機運遂遷周鼎于時蠻夷猾夏荆楊未一劬

勞日吳經營四方樓船南邁則金陵失險驃騎北指則單于歎塞職方所載並入疆理禹貢所圖咸受正朔雖晉武之克平吳會漢宣之推亡固存比義論功不能尚也七德既敷九歌已洽要荒咸暨尉候無警於是躬節儉平徭賦倉廩實法令行君子咸樂其生小人各安其業強無陵弱衆不暴寡人物殷阜朝野歡娛二十年間天下無事區宇之內晏如也考之前王足以參蹤盛烈但素無學術不能任下無寬仁之度有刻薄之資暨乎暮年此風逾扇又雅好符瑞暗於大道建彼維城權侷京室人皆同帝制靡所適從聽哲婦之言惑邪臣之說溺寵廢嫡託付失人滅父子之道開昆弟之隙縱其尋斧剪伐本枝墳土未乾子孫繼踵屠戮松檟纒列天下皆非隋有惜哉迹其衰怠之源稽其亂亡之兆起自高祖成於煬帝所由來遠矣非一朝

一夕其不祀忽諸未爲不幸也

煬皇帝

隋書曰煬皇帝諱廣一名英小字阿廢高祖第二子也母曰文獻獨孤皇后上美姿儀少敏惠高祖及后於諸子中特所鍾愛在周以高祖勳封鴈門郡公開皇元年立爲晉王拜柱國并州總管時年十三尋授武衛大將軍進位上柱國河北道行臺尚書令大將軍如故高祖令項城公歆安道公才季徹輔導之上好學善屬文沉深嚴重朝野屬望高祖密令善相者來和遍視諸子和曰晉王眉上雙骨隆起貴不可言旣而高祖幸上居第見樂器絃多斷絕又有塵埃若不用者以爲不好聲妓善之上尤自矯飾當時稱爲仁孝嘗觀獵遇雨左右進油衣上曰士卒皆霑濕我獨衣此乎乃令持去六年轉淮南道行臺尚書令其年徵

拜雍州牧內史令八年冬大舉伐陳以上爲行軍元帥及
陳平進位太尉賜輅車乘馬袞冕之服玄珪白璧各一復
拜并州總管高祖之祠太山領武侯大將軍明年歸藩後
數載突厥寇邊復爲行軍元帥出靈武無虜而還及太子
勇廢立上爲皇太子是月當受冊高祖曰吾以大興公成
帝業今上出舍大興縣其夜烈風大雪地震山崩民舍多
壞壓死者百餘口仁壽初奉詔巡撫東南是後高祖每避
暑仁壽宮恒令上監國四年七月高祖崩上卽皇帝位於
仁壽宮八月奉梓宮還京師并州總管漢王諒舉兵反詔
尚書左僕射楊素討平之十一月癸丑詔可於伊雜營建
東京即設官分職以爲民極也大業元年正月壬辰朔大
赦改元立妃蕭氏爲皇后改豫州爲秦州洛州爲豫州廢
諸州總管府景申立晉王昭爲皇太子三月丁未詔尚書

令楊素納言楊達將作大匠宇文愷營建東京徙豫州郭
下居民以實之辛亥發河南諸郡男女萬餘開通濟渠自
西苑引穀洛水達於河自板渚引河通於淮庚申遣黃門
侍郎王弘上儀同于士澄往江南採木造龍舟鳳舸黃龍
赤艦樓船等數萬艘七月景子詔曰今宇宙平一文軌攸
同十步之內必有芳草四海之中豈無奇秀諸在家及見
入學者若有篤志好古耽悅典墳學行優敏堪膺時務所
在採訪具以名聞即當隨其器能擢以不次八月壬寅上
御龍舟幸江都以左武衛大將軍郭衍爲前軍李景爲後
軍文武官五品已上給樓船九品已上給黃篋舳舻相接
二百餘里冬十月己丑赦江淮已南揚州給復五年舊摠
管內給復三年二年春正月辛酉東京成賜監督者各有
差三月庚午車駕發江都夏四月庚戌上自伊闕陳法駕

備千乘萬騎入於東京辛亥上御端門大赦免天下今年租賦三年四月甲午詔曰夫孝悌有聞人倫之本德行敦厚立身之基或節義可稱或操履清潔所以激貪厲俗有益風化強毅正直執憲不撓學業優敏文才美秀並爲廊廟之用寔乃瑚璉之資才堪將略則拔之以禦侮膺力驍壯則任之以爪牙爰及一藝可取亦宜採錄衆善畢舉與時無弃以此求治庶幾非遠文武有職事者五品已上宜依令十科舉人有一於此不必求備朕當待以不次隨才升擢景中車駕北巡狩六月戊子次榆林郡丁酉啓民可汙來朝己亥吐谷渾高昌並遣使貢方物甲辰上御北樓觀漁於河以宴百僚秋七月辛亥啓民可汙上表請變服襲冠帶詔啓民贊拜不名位在諸侯王上甲寅上於郡城東御大帳其下備儀衛建旌旗宴啓民及其部落三千五

百人奏百戲之樂賜啓民及其部各有差八月壬午車駕發榆林乙酉啓民飾廬清道以候乘輿帝幸其帳啓民奉觴上壽宴賜極厚上謂高麗使者曰歸語尔王當早來朝見不然者吾與啓民巡彼土矣皇后亦幸義城主帳己丑啓民可汙歸蕃癸巳入樓煩關壬寅次太原詔營晉陽宮九月己未次濟源幸御史大夫張衡宅宴享極歡己巳至于東都五年三月己巳車駕西巡河右乙亥幸扶風舊宅夏四月己亥大獵於隴西壬寅高昌吐谷渾伊吾並遣使來朝乙巳狄道党項羌來貢方物癸亥出臨津關渡黃河至西平陳兵講武五月乙亥上獵於拔延山長圍周亘二千里庚辰入長寧谷度星嶺甲申宴群臣於金山之上六月景午次張掖辛亥詔諸郡學業該通才藝優敏膺力驍壯超絕等倫在官勤奮堪理政事立性正直不避強禦四

科舉人王子高昌王麴伯雅來朝伊吾吐屯設等獻西域
數千里之地上大悅景辰上御觀風行殿盛陳文物奏九
部樂設魚龍曼延宴高昌王吐屯設於殿上以寵異之其
蠻夷陪列者三十餘國戊午大赦天下開皇已來流配悉
放還鄉晉陽逆黨不在此例隴右諸郡給復一年行經之
所給復二年秋七月丁卯置馬牧於青海渚中以求龍種
無効而止九月癸未車駕入長安六年二月庚申徵魏齊
周陳樂人悉配太常三月癸亥幸江都宮甲子以鴻臚卿
史祥爲左驍衛大將軍夏四月丁未宴江淮已南父老頒
賜各有差七年二月己未上升鈞臺臨楊子津大宴百寮
頒賜各有差庚申百濟遣使朝貢乙亥上自江都御龍舟
入通濟渠遂幸於涿郡八年正月辛巳大軍集於涿郡壬
午下詔曰高麗小醜昏迷不恭崇聚渤海之間荐食遼海

之境親搃六師用伸九伐拯厥阨危協從天意若高元泥
首轅門自歸司寇卽宜解縛焚櫬弘之以恩其餘臣人歸
朝奉順咸加撫慰各安生業隨才任用無隔夷夏營壘所
次務在整肅芻蕘有禁秋毫勿犯布以恩宥喻以禍福若
其同惡相濟抗拒官軍國有常刑俾無遺類明加曉示稱
朕意焉摠管一百一十三萬三千八百號二百萬其餽運
者倍之癸未第一軍發終四日引師乃盡旌旗亘千里
近古出師之盛未之有也三月癸巳上御師甲午臨戎於
遼水橋戍戍大軍爲賊所拒不果濟右屯衛大將軍左光
祿大夫麥鐵杖武賁郎將錢士雄孟金义等皆死之甲午
車駕渡遼大戰於東岸擊賊破之進圍遼東時諸將各奉
旨不敢赴機旣而高麗各城守攻之不下六月己未幸遼
東責怒諸軍止城西數里御六合城七月壬寅宇文述等

敗績於薩水右屯衛將軍辛世雄死之九軍並陷將帥奔
還亡者二千餘騎癸卯班師九月庚寅上至東都九年春
正月丁丑徵天下兵募民爲驍果集於涿郡二月戊寅幸
遼東以越王侗民部尚書樊子蓋留守東都庚子北海人
郭方預聚徒爲盜自號盧公衆至三萬攻陷郡城大掠而
去夏四月庚午車駕渡遼壬申遣宇文述楊義臣趣平壤
五月丁丑熒惑入南斗己卯濟北人甄寶車聚衆萬餘寇
掠城邑六月乙巳禮部尚書楊玄感反於黎陽丙辰玄感
逼東都河南贊治裴弘策拒之反爲賊所敗戊辰兵部侍
郎斛斯政奔於高麗庚午上班師高麗犯後軍八月壬寅
左翊衛大將軍宇文述等破楊玄感於閭鄉斬之餘黨悉
平十年二月辛卯詔曰蕞尔高麗僻居荒表鴟張狼噬侮
慢不恭抄竊我邊陲侵軼我城鎮是以去歲出軍問罪遼

謁殪長蛇於玄菟戮封豕於襄平扶餘衆軍風馳電逝追
奔逐北徑踰沮水滄海舟楫衝賊腹心焚其城郭汚其宮
室高元伏鑽泥首送欵軍門尋請入朝歸罪司寇朕以許
其改過乃詔班師而長惡靡悛宴安鳩毒此而可忍孰不
可容便可分命六師百道俱進朕當親執武節臨御諸軍
秣馬九都觀兵遼水順天誅於海外救窮民於倒懸征伐
以正之明德以誅之止除元惡餘無所問三月壬子行幸
涿郡癸亥次臨渝宮親御戎服禡祭黃帝斬叛軍者以釁
鼓秋七月甲子高麗遣使降囚送斛斯政上大悅八月己
巳班師十二月壬申上如東都其日大赦天下戊子入東
都十二年七月甲子幸江都宮以越王侗光祿大夫段達
大府卿元文都檢校民部尚書韋津右武衛將軍皇甫無
逸右司郎盧楚等摠留後事十三年二月己丑馬邑校尉

劉武周殺太守王仁恭舉兵作亂北連突厥自稱定楊可
汙庚寅賊帥李密翟讓等陷興洛倉越王侗遣武賁郎將
劉長恭光祿少卿房崱擊之反爲所敗死者十五六庚子
李密自號魏公稱元年開倉以賑羣盜衆至數十萬河南
諸郡相繼皆陷焉五月甲子唐公起義師於太原景寅突
厥數千寇太原唐公擊破之秋七月壬子煇惑守積屍景
辰武威人李軌舉兵反攻陷河西諸郡自稱涼王建元安
樂八月辛巳唐公破武牙郎將宋老生於霍邑斬之十一
月景辰唐公入京師辛酉遙尊帝爲太上皇立代王侑爲
帝改元義寧帝在江都聞唐公舉兵動容者久之以手琢
按日渠有奇相渠得之矣如此者再三遂欲渡江幸丹陽
時宿衛諸將皆是秦人各有懷土之志宇文化及因人之
心與裴虔通作亂入犯宮闈宿衛皆走遂執帝將出示衆

數以十罪復引帝入求鳩不得令狐行達牽帝使坐以練
布謚之時年五十蕭后令宮人撒床簀爲棺以埋之化及
發後右禦衛將軍陳稜奉梓宮於成象殿葬吳公臺下發
歛之始容兒若生衆咸異之唐平江南之後改葬雷塘初
上自以蕃王次不當立每矯情飾行以釣虛名陰有奪宗
之計時高祖雅信文獻皇后而性忌媵妾皇太子勇內多
嬖幸以此失愛帝後庭有子皆不育之示無私寵取媚於
后大臣用事者傾心與交中使至第無貴賤皆曲承顏色
伸以厚禮婢僕往來者無不稱其仁孝又常私入宮掖密
謀於獻后楊素等因機構扇遂成廢立

太平御覽卷第一百六

隋恭皇帝諱侑元德太子之子也母曰韋妃性聰敏有器度大業三年立為陳王後數載徙為代王邑萬戶及煬帝親征遼東令於京師摠留事十一年從幸晉陽拜太原太守尋鎮京師義兵入長安尊煬帝為太上皇奉帝纂業大業十三年十一月壬戌上即皇帝位於大興殿詔大赦天下改義寧元年大辟罪已下咸赦除之甲子以光祿大夫大將軍太尉唐公為假黃鉞使持節大都督內外諸軍事尚書令大丞相進封唐王二年三月丙辰右屯衛將軍宇文弒太上皇於江都宮立秦王浩為帝戊辰詔

太平御覽卷第一百七

皇王部三十二

隋恭皇帝

李密

王世充

寶建德附

隋書曰恭皇帝諱侑元德太子之子也母曰韋妃性聰敏有器度大業三年立為陳王後數載徙為代王邑萬戶及煬帝親征遼東令於京師摠留事十一年從幸晉陽拜太原太守尋鎮京師義兵入長安尊煬帝為太上皇奉帝纂業大業十三年十一月壬戌上即皇帝位於大興殿詔大赦天下改義寧元年大辟罪已下咸赦除之甲子以光祿大夫大將軍太尉唐公為假黃鉞使持節大都督內外諸軍事尚書令大丞相進封唐王二年三月丙辰右屯衛將軍宇文弒太上皇於江都宮立秦王浩為帝戊辰詔

唐王脩九錫之禮加璽紱遠遊寇綠緌綬位在諸侯王上
唐國置丞相以下一依舊式五月戊午詔曰天禍隋國大
行太上皇遇盜江都酷甚望夷覺深驪北憫予小子奄逮
丕讐哀號永感心情糜潰仰惟荼毒仇復靡申形影相吊
罔知啓處相國唐王膺期命世扶危拯溺自北徂南東征
西怨惣九合於一匡決百勝於千里糾率夷夏大庇氓黎
保乂朕躬繫王是賴德侔造化功格蒼旻兆庶歸心曆數
斯在屈爲人臣載違天命在昔虞夏揖讓相推苟非重華
誰堪命禹當今九服崩離三靈改卜大運去矣請避賢路
兆謀布德顧已莫能私僮命駕須歸蕃國予本代王及予
而代天之所廢豈期如是庶憑稽古之聖以誅四凶幸值
惟新之恩預充三恪雪寃恥於皇祖守禋祀於孝孫朝聞
夕殞及泉無恨今遵故事遜于舊邸庶官群辟改事唐朝

宜依前典趣上尊號若釋重負感泰兼懷假手真人俾除
醜逆濟濟多士明知朕意仍勅有司凡有表奏皆不得以
聞是日上遜位于大唐唐以上爲鄗國公武德二年夏五
月崩時年十五

史臣曰恭帝年在幼冲遭家多難一人失德四海土崩羣
盜蜂起豺狼塞路南巢遂往流彘不歸旣鍾百六之期躬
踐數終之運謳歌有屬笙鏞變響雖欲不遵堯舜之迹其
庸可得乎

李密

唐書曰李密字玄邃本遼東襄平人也父寬隋上柱國蒲
山公密以父蔭爲左親侍常在仗下煬帝頗見之退謂許
公宇文述曰向者左仗下黑色小兒爲誰許公對曰故蒲
山公李寬子密也帝曰箇小兒視瞻異常勿令宿衛他日

述謂密曰弟聰令如此當以才學取官三官三衛藜非
養賢之所密大喜因謝病專以讀書爲事時人希見其面
嘗欲尋包愷乘一黃牛被以蒲鞵仍將漢書一帙掛於角
上一手捉牛鞵一手翻卷書讀之尚書令越國公楊素見
於道從後按轡躡之既及問曰何處書生耽學若此密識
越公乃下再拜自言姓名又問所讀書荅曰項羽傳越公
奇之與語大悅謂其子玄感等曰吾觀李密識度汝等不
及於是玄感傾心結託大業九年煬帝伐高麗使玄感於
麗陽監運時天下騷動玄感將謀舉兵潛遣人入關迎密
以爲謀主密至謂玄感曰今天子出征遠在遼外今公擁
兵出其不意長驅入薊直扼其喉前有高麗退無歸路不
過旬朔資糧必盡舉麾一召其衆自降不戰而擒此計之
上也關中四塞天府之國若西入長安掩其無備天子雖

還失其襟帶據險臨之固當必尅萬全之勢此計之中也
若隨近逐便先向東都頓堅城之下勝負殊未可知此計
之下也玄感曰公之下計乃上策也密計遂不行及玄感
敗密乃間行入關爲捕者所獲時煬帝在高麗密與其黨
俱送帝所及出關外防禁漸弛密請通市酒食每夜醺飲
誼譁竟夕使者不以爲意行至邯鄲密等七人夜穿牆而
遁詣淮陽隱姓名自稱劉智遠聚徒教授經數月密鬱鬱
不得志爲詩曰金風蕩初節玉露凋晚林此夕窮塗土鬱
陶傷寸心野平葭葦合村落蘆藜深眺聽良多感徒倚獨
霑襟霑襟何所爲悵然懷古意秦俗猶未平漢道將何異
樊噲市井屠蕭何刀筆吏一朝時運會萬古傳名謚寄言
世上英雄生真可愧詩成而泣下數行會東郡賊帥翟讓
聚黨萬餘人密往歸之密因王伯當以策干讓曰當今主

昏於上人怨於下銳兵盡於遼東和親絕於突厥方乃巡遊楊越委弃京都此亦劉頂奮起之會以足下雄才大略席卷二京誅滅暴虐則隋氏之不足亡也讓深加敬異遣說諸小賊所至皆降密又說讓曰今兵衆既多糧無所出若直取滎陽休兵館穀待士馬肥充然可與人爭利讓以爲然於是破金提關掠滎陽諸縣城堡多下之滎陽太守楊慶及通守張須陁以兵討讓讓大懼將遠避之密曰須陁勇而無謀兵又驟勝旣驕且很可一戰而擒之公但列陣以待爲公破之將戰密分兵千餘人於林木間設伏讓與戰不利稍却密發伏自後掩之須陁衆潰與讓合擊大破之遂斬須陁於陣讓於是令密別統所部密尋復說讓曰昏主蒙塵播蕩吳越羣兵競起海內飢荒明公以英傑之才統驍雄之旅宜當廓清天下誅翦羣凶豈可求食草

間常爲小盜而已今東都士庶中外離心留守諸官政令不一明公親率大衆直掩興洛倉發粟以賑窮乏遠近孰不歸附百萬之衆一朝可集先發制人此機不可失也讓曰請君先發僕領諸軍便爲後殿得倉之日當別議之大業十三年春密與讓領精兵七千人出陽城北踰方山自羅口襲興洛倉破之開倉恣人所取老弱襁負道路不絕衆至數十萬隋越王侗遣虎賁郎將劉長恭率步騎二萬五千討密密一戰破之長恭僅以身免讓於是推密爲主號爲魏公二月於鞏南設壇場卽位稱元年其文書行下稱行軍元帥魏公府拜翟讓爲司徒封東郡公於是城洛口以居之隋虎賁郎將裴仁基率其子行儼以武牢歸密因遣仁基與孟讓率兵二萬餘人襲回洛倉破之入東都郭郭掠居人燒天津橋東都出兵乘之仁基等大敗密復

卷一百七
四
親率兵三萬逼東都將軍段達等出兵七萬拒之戰於故
都城隋軍敗走密復下回洛倉而據之大修營塹以逼東
都仍作書數煬帝十罪以移郡縣密兵鋒甚銳每入苑與
隋軍連戰會密爲流矢所中卧於營內東都復出兵乘之
密衆大潰弃回洛倉歸于洛口煬帝遣王世充率勁卒五
萬擊之密與戰不利世充營於洛西與密相拒百餘日大
小六十餘戰武陽郡丞元寶藏黎陽賊帥李文相平原賊
帥郝孝德等並歸於密共襲破黎陽倉據之翟讓部將王
儒信勸讓爲大冢宰摠統衆務以奪密之權讓兄寬復謂
讓曰天子止可自作安得與人汝若不能作我當爲之密
聞其言陰有圖讓之計會世充列陣而至讓出拒之爲世
充所擊讓軍少失利密率精銳赴之世充敗走明日讓至
密所欲爲宴樂具饌以待之密引讓入坐以良弓示讓讓

滿密遣壯士自後斬之并殺其兄寬及王儒信讓部將徐
世勣單雄信等頓首求哀密並釋而慰諭之乃命徐世勣
單雄信王伯當分統其衆未幾世充襲倉城密復破之世
充復移營洛北造浮橋悉衆以擊密密與千餘騎拒之不
利而退世充因薄其城下密簡銳卒數百人以邀之世充
大潰乘勝陷偃師於是修金墉城居之有衆三十餘萬將
作大匠宇文愷叛東都降于密東至海岱南至江淮郡縣
莫不遣使歸密竇建德朱粲楊士林孟海公徐圓朗盧祖
尚周法明等並遣使通表於密勸進於是密下官屬咸勸
密卽尊號密曰東都未平不可議此及義旗建密負其強
盛欲自爲盟主乃致書于高祖爲兄請合從以滅隋高祖
覽書笑曰李密陸梁放肆不可以折簡致之吾方安輯京
師未遑東討卽相阻絕便是更生一秦密今通所以爲吾

南幸恐同永嘉之勢顧此中原鞠爲茂草與言感歎實疾于懷脫知動靜遲數貽報未面虛襟用增勞軫名利之地鋒鏑縱橫深慎垂堂勉茲鴻業密得書甚悅示其部下曰唐公見推天下不足可定於是不虞義師而專意於世充俄而宇文化及率衆自江都北指黎陽兵十餘萬密乃自將步騎二萬拒之隋越王侗稱尊號遣使者授密太尉尚書令東南道大行臺行軍元帥魏國公令先平化及然後入朝輔政密將與化及相抗恐前後受敵因卑辭以報謝焉化及至黎陽與密相遇密遣徐世勣守倉城化及攻之不能下密知化及糧且盡因僞與和以弊其衆化及弗之悟大喜恣其兵食與密饋之後知其計化及怒與密大戰于衛州之童山下密爲流矢所中頓於汲縣化及力竭糧盡衆多叛之掠汲縣北趨魏縣密引兵而西遣使朝于東

都執弒煬帝者于弘達以獻越王侗侗召密入朝至温縣聞世充作難而止乃歸金墉城密雖據倉而無府庫兵數戰皆不獲賞又厚撫初附之兵由是衆心漸怨武德元年九月世充以其衆五千來決戰密留王伯當守金墉自引精兵就偃師北阻邙山以待之世充軍至密遂敗績於萬余人馳向洛密將入洛口倉城邴元真已遣人潛引世充密陰知之不發其事欲待世充兵半渡洛水然後擊之及世充軍至密候騎不時覺比將出戰世充軍已濟矣密自度不能支引騎而遁徑赴武牢元真以城降於世充密將如黎陽或謂密曰殺翟讓之際徐世勣幾至於死今向其所安可保乎時王伯當弃金墉保河陽密以輕騎自武牢歸之謂伯當曰兵敗矣久苦諸君我今自刎請以謝衆伯當抱密號叫慟絕衆皆泣莫能仰視密復曰諸君幸不相

六代通鑑 卷一百七
六
弃當共歸關中密身雖媿無功諸君必保富貴於是從入關者尚二萬人高祖遣使迎勞相望於道密大喜謂其徒曰我有衆百萬一朝至此命也今事敗歸國幸蒙殊遇當思竭忠以事所奉耳且山東連城數百知吾至此遣使招之盡當歸國比於竇融勳亦不細豈不以一台司見處乎及至京師禮數益薄尋拜光祿卿封邢國公未幾聞其所部將帥皆不附世充高祖使密領本兵往黎陽招集故時將士經略世充時王伯當爲左武衛將軍亦令爲副密行至桃林高祖復徵之密大懼謀將叛伯當頗止之密不從因謂密曰義士之立志也不以存亡易心伯當荷公恩禮期以性命相報乃簡驍勇數十人著婦人衣戴羃羅藏刀裙下詐爲妻妾自率之入桃林縣舍須臾變服突出因據縣城驅掠畜產直趣南山時右翊衛將軍史萬寶留鎮熊

州遣副將盛彥師率步騎數千追躡至陸渾縣南七十里與密相及彥師伏兵山谷密軍半渡橫出擊敗之遂斬密時年三十七

王世充附

又曰王世充字行滿本姓支西域胡人也世充頗涉經史尤好兵法及龜策推步之術開皇中以軍功拜儀同善敷奏明習法律然舞弄文法高下其心或有駁難之者世充利口飾非辭議鋒起衆雖知其不可而莫能屈大業中累遷江都郡丞兼領江都宮監時煬帝數幸江都世充善候人主顏色阿諛順旨每入言事帝必稱善乃雕飾池臺陰奏遠方珍物以媚於帝由是益昵之十年齊郡賊帥孟讓自長白山寇掠諸郡至盱眙有衆十餘萬世充以兵拒大破之煬帝以世充有將帥才略復遣領兵討諸小盜所向

盡平十一年突厥圍煬帝於鴈門世充盡發江都人將往
赴難在軍中蓬首垢面悲泣無度曉夜不解甲藉草而卧
煬帝聞之以爲忠益信任之十二年遷江都通守及李密
攻陷洛口倉進逼東都煬帝特詔世充大發兵於洛口以
拒密又遣就軍拜世充爲將軍趣令破賊世充引軍渡洛
水與李密戰世充軍敗績乃率餘衆歸河陽時天寒大雪
比至河陽纔以千數世充自繫獄請罪越王侗遣使赦之
徵還洛陽置營於含嘉倉城收合亡散復得萬余人俄而
宇文化及作難越王侗嗣位於東都拜世充爲吏部尚書
封鄭國公進拜尚書左僕射摠督內外諸軍事世充去含
嘉城移居尚書省專宰朝政以其兄世暉爲內史令入居
禁中子弟咸擁兵馬鎮諸城邑未幾李密破宇文化及還
其勁兵良馬多戰死士卒疲倦世充欲乘其弊而擊之恐

人心不一乃假託鬼神言夢見周公乃立祠於洛水遣巫
宣言周公欲令僕射急討李密當有大功不音則兵皆疫
死充兵多楚人俗信妖言衆皆請戰世充簡練精勇得二
萬余人馬二千余疋軍於洛水南密軍偃師北山上世充
令軍人秣馬蓐食遲明而薄密密軍潰以數十騎走河陽
率餘衆入朝世充盡收其衆振旅而還侗進世充太尉以
尚書省爲府備置官屬世充嘗於侗前賜食還家遂大嘔
吐疑遇毒所致自是不復朝請與侗絕矣遣雲定興段達
入奏於侗請加九錫之禮二年三月遂策授相國摠百揆
封鄭王加九錫備物段達雲定興等入見於侗曰天命不
常鄭王功德甚盛願陛下揖讓告禪遵唐虞之迹侗怒四
月假爲侗詔策禪位遣兄世暉廢侗於含涼殿僭卽皇帝
位建元曰開明國號鄭立子玄應爲皇太子世充每聽朝

必殷勤誨諭言詞重復千端萬緒或輕騎遊歷街衢亦不清道百姓但避路而已按轡徐行謂百姓曰昔時天子深坐九重下情無由聞徹世充非貪寶位本欲救時今當如一州刺史每事親覽當與士庶共評朝政今止於順天門外置座聽朝又令西朝堂受抑屈東朝堂受直諫於是獻書上事日有數百條流既煩省覽難遍數日後不復更出世充遣其姪行本鳩殺侖諡曰恭皇帝十月世充率衆東徇地至于滑州仍以兵臨黎陽世充屯兵不散倉粟日盡城中人相食七月秦王率兵攻之陳兵於青城宮世充悉兵來拒隔澗而言曰隋末喪亂天下分崩長安洛陽各有分地世充唯願自守不敢西侵王乃盛相侵軼遠入吾地三嶠之道千里饋糧以此出師未見其可太宗謂曰四海之內皆承正朔唯公執迷獨阻聲教東都士庶亟請王師

關中義勇咸思致力至尊重違衆願有斯吊伐若轉禍來降則富貴可保如欲相抗無假多言世充無以報太宗分遣諸將攻其城鎮所至輒下九月王君廓攻拔世充之轘轅縣於是河南州縣相次降附十一月竇建德遣人結好并陳救援之意世充乃遣其兄子琬及內史令長孫安世報聘且乞師四年二月世充率兵出方諸門與王師相抗世充軍敗因乘勝追之屯其城門世充不復敢出但嬰城自守以待建德之援三月秦王擒建德并王琬長孫安世等于武牢迺至東都城下以示之且遣安世入城使言敗狀世充惶惑不知所爲將潰圍而出南走襄陽謀於諸將皆不荅乃率其將吏詣軍門請降秦王以世充至長安高祖數其罪世充對曰計臣之罪誠不容誅但陛下愛子秦王許臣不死高祖乃釋之與兄芮妻子同徙于蜀將行爲

讎人獨孤修德所殺世充自篡位凡三年而滅

寶建德附

又曰寶建德貝州漳南人也少時頗以然諾爲事初里長犯法亡去會赦得歸父卒送葬者千餘人有所贈皆讓而不受大業七年募人討高麗本郡遂補建德爲二百長時山東大水人多流散同縣有孫安祖家爲水所漂妻子餒死縣以安祖驍勇亦選在行中安祖辭貧自言于漳南令令怒答之安祖刺殺令亡投建德建德舍之是歲山東大饑建德謂安祖曰丈夫不死當立大功豈可爲逃亡之虜也我知高雞泊中廣大數百里莞蒲阻深可以逃難承閒而出虜掠足以自資旣得聚人且觀時變必有大功於天下矣安祖然其計建德招誘逃兵及無產者得數百人令安祖率之入泊中爲羣盜安祖自稱將軍時鄒人張金稱

亦結聚得萬人在河阻中稽人高士達又起兵得千餘人在清河界中時諸盜往來漳南者所過皆殺掠居人焚燒舍宅獨不入建德之間由是郡縣意建德與賊徒交結收繫家屬無少長皆殺之建德聞其家被屠滅率麾下二百人亡歸士達士達自稱東海公以建德爲司兵後安祖爲張金稱所殺其兵數千人又盡歸于建德自此漸盛兵至萬餘人猶往來高雞泊中十二年涿郡通守郭絢率兵萬餘人來討士達士達自以智略不及建德乃推爲軍司馬咸以兵授焉建德旣初統衆欲立奇功以威羣賊請士達守輜重自簡精兵七千人以拒絢大破絢軍絢以數十騎遁走遣將追及於平原斬其首以獻士達由是建德之勢益振隋遣太僕卿楊義臣率兵萬余人討張金稱破之於清河所獲賊衆皆屠滅餘散在草澤間者復相聚而投建

德義臣乘勝至平原欲入高雞泊建德謂士達曰慰觀隋將善用兵者唯義臣耳新破金稱遠來襲我其鋒不可當請引兵避之令其欲戰不得空延歲月必將疲倦乘便襲擊可有大功今與爭鋒恐公不能敵也士達不從其言因留建德守壁自率精兵逆擊義臣義臣果大破士達於陣前斬之乘勢追奔將圍建德守兵既少聞士達敗衆皆潰散建德率百餘騎亡去義臣既殺士達以爲建德不足憂建德復還平原招集亡卒得數千人軍復大振始自稱將軍此後隋郡縣長吏稍以城降之軍容益盛勝兵十余萬人十三年正月築壇場於河間樂壽界中自稱長樂王年號丁丑署官屬於是建德進攻河間頻戰不下其後城中食盡又聞煬帝被殺郡丞王琮率士吏發喪建德遣使吊之琮因使者請降始都樂壽號曰金城宮自是郡縣多下

之武德二年宇文文化及僭號於魏縣建德即日引兵討文化及連戰大破之文化及保聊城建德四面攻城陷之建德入城先謁隋蕭皇后與語稱臣盡收弒煬帝元謀者斬之梟首轅門之外囚化及并其二子同收以檻車至大陸縣斬之攻陷洛州虜刺史表子幹遷都于洛州號萬春宮又與王世充結好遣使朝隋越王侗於洛陽後世充廢侗自立乃絕之始自尊大建天子旌旗出入警蹕下書言詔追謚隋煬帝爲閔帝然猶依倚突厥隋義城公主先嫁突厥又傳化及首以獻公主既與突厥相連兵鋒益盛南侵相州河北大使淮安王神通不能拒退奔黎陽相州陷又進攻衛州陷黎陽九月建德自帥師圍幽州羅藝出與戰大破之斬首千二百級先是曹州濟陰人孟海公擁精兵三萬據周橋城以掠河南之地其年十一月建德自率兵渡河

太平御覽 卷一百七
以擊之四年二月建德尅周橋虜海公留其將范願守曹州悉發海公及徐圓助之衆來救世充軍至滑州世充行臺僕射韓洪開城納之遂進逼元州梁州管州皆陷之屯于滎陽三年春秦王入武牢進薄其營多所傷殺并擒其將殷秋石瓚時世充弟世辯爲徐州行臺遣其將郭士衡領兵千人從之合衆十餘萬號爲三十萬次成臯築宮于板渚以示必戰又遣間使約世充共爲表裏秦王遣將軍王君廓領輕騎千餘抄其糧運獲其大將張青特虜獲其衆建德數不利人情危駭將師已下破孟海公皆有所獲思歸洺州凌敬進說曰宜悉兵濟河攻取懷州河陽使重將居守更率衆鳴鼓建旗踰太行入上黨先聲後實傳檄而定漸趨壺口稍駭蒲津收河東之地此策之上也行此必有三利一則入無人之境師有萬全二則拓土得兵三

則鄭圍自解建德將從之而世充之使長孫安世陰齎金玉啗其諸將以亂其謀衆咸進諫曰凌敬書生耳豈可與言戰乎建德從之敬固爭建德怒扶出焉於是悉衆進逼武牢官軍按甲挫其銳建德結陣於汜水秦王遣騎挑之建德進軍而戰竇抗當之建德少却秦王馳騎深入大破之建德中瘡竄於牛口谷車騎將軍白士讓揚武威生獲之建德所領兵衆一時奔潰妻曹氏及其左僕射齊善行將數百騎遁于洺州餘黨欲立建德養子爲主善行曰夏王平定河朔士馬精強一朝旣被擒如此豈非天命有所歸也不如委心請命無爲塗炭生人遂以府庫財物悉分與故將各令散去善行乃與建德右僕射裴矩行臺曹旦及建德妻率僞官屬舉山東之地奉傳國八璽來降七月秦王俘建德至京師斬于長安市年四十九自起軍至滅

